

Namo tassa bhagavato arahato sammāsambuddhassa

Khuddakanikāye

Buddhavaṃsapāḷi

1. Ratanacaṅkamanakaṇḍaṃ

1. Brahmā ca lokādhīpatī sahaṃpatī [[sahaṃpatī \(syā. kaṃ.\)](#)], katañjalī anadhivaraṃ ayācatha;
“Santīdha sattāpparajakkhajātikā, desehi dhammaṃ anukampimaṃ pajamaṃ”.
2. Sampannavijjācaraṇassa tādino, jutindharassantimadehadhārino;
Tathāgatassappaṭipuggalassa, uppajji kāruṇṇatā sabbasatte.
3. “Na hete jānanti sadevamānūsā, buddho ayaṃ kīdisako naruttamo;
Iddhibalaṃ paññābalaṅca kīdisaṃ, buddhabalaṃ lokahitassa kīdisaṃ.
4. “Na hete jānanti sadevamānūsā, buddho ayaṃ edisako naruttamo;
Iddhibalaṃ paññābalaṅca edisaṃ, buddhabalaṃ lokahitassa edisaṃ.
5. “Handāhaṃ dassayissāmi, buddhabalamanuttaraṃ;
Caṅkamaṃ māpayissāmi, nabhe ratanamaṇḍitaṃ”.
6. Bhumā mahārājikā tāvatimsā, yāmā ca devā tusitā ca nimmitā;
Paranimmitā yepi ca brahmacāyikā, ānanditā vipulamakaṃsu ghosaṃ.
7. Obhāsītā ca pathavī sadevakā, puthū ca lokantarikā asaṃvutā;
Tamo ca tibbo vihato tadā ahu, disvāna accherakaṃ pāṭihīraṃ.
8. Sadevagandhabbamanussarakkhase, ābhā ulārā vipulā ajāyatha;
Imasmiṃ loke parasmīṅcobhayasmiṃ [[parasmīṃ cūbhaye \(syā. kaṃ.\)](#)], adho ca uddhaṃ
tiriyaṅca vitthataṃ.
9. Sattuttamo anadhivaro vināyako, satthā ahū devamanussapūjito;
Mahānubhāvo satapuññalakkhaṇo, dassesi accherakaṃ pāṭihīraṃ.
10. So yācito devavarena cakkhumā, atthaṃ samekkhitvā tadā naruttamo;
Caṅkamaṃ [[caṅkamaṃ tattha \(sī.\)](#)] māpayi lokanāyako, suniṭṭhitaṃ sabbaratananimmitaṃ.
11. Iddhī ca ādesanānūsāsānī, tipāṭihīre bhagavā vasī ahu;
Caṅkamaṃ māpayi lokanāyako, suniṭṭhitaṃ sabbaratananimmitaṃ.
12. Dasasahassīlokadhātuyā, sinerupabbatuttame;
Thambheva dassesi paṭipāṭiyā, caṅkame ratanāmaye.
13. Dasasahassī atikkamma, caṅkamaṃ māpayī jino;
Sabbasoṇṇamayā passe, caṅkame ratanāmaye.
14. Tulāsaṅghāṭānuvaggā, sovaṇṇaphalakatthātā;

Vedikā sabbasovaṇṇā, dubhato passesu nimmitā.

15. Maṇimuttāvālukākiṇṇā, nimmito ratanāmayo;
Obhāseti disā sabbā, sataraṃsīva uggato.
16. Tasmim caṅkamane dhīro, dvattimsavaralakkhaṇo;
Virocamāno sambuddho, caṅkame caṅkamī jino.
17. Dibbaṃ mandāraṃ pupphaṃ, padumaṃ pārichattakaṃ;
Caṅkamane okiranti, sabbe devā samāgatā.
18. Passanti taṃ devasaṅghā, dasasahassī pamoditā;
Namassamānā nipatanti, tuṭṭhahaṭṭhā pamoditā.
19. Tāvatiṃsā ca yāmā ca, tusitā cāpi devatā;
Nimmānaratino devā, ye devā vasavattino;

Udagacittā sumanā, passanti lokanāyakaṃ.
20. Sadevagandhabbamanussarakkhasā, nāgā supaṇṇā atha vāpi kinnarā;
Passanti taṃ lokahitānukampakaṃ, nabheva accuggatacandamaṇḍalam.
21. Ābhassarā subhakiṇhā, vehapphalā akaniṭṭhā ca devatā;
Susuddhasukkavattavasana, tiṭṭhanti pañjalikatā.
22. Muñcanti pupphaṃ pana pañcavaṇṇikaṃ, mandāraṃ candanacuṇṇamissitaṃ;
Bhamenti celāni ca ambare tadā, “aho jino lokahitānukampako.
23. “Tuvaṃ sathā ca ketū ca, dhajo yūpo ca pāṇinaṃ;
Parāyano patiṭṭhā ca, dīpo ca dvipaduttamo [dipaduttamo (sī. syā.)].
24. “Dasasahassīlokadhātuyā, devatāyo mahiddhikā;
Parivāretvā namassanti, tuṭṭhahaṭṭhā pamoditā.
25. “Devatā devakaññā ca, pasannā tuṭṭhamānasā;
Pañcavaṇṇikapupphehi, pūjayanti narāsabhaṃ.
26. “Passanti taṃ devasaṅghā, pasannā tuṭṭhamānasā;
Pañcavaṇṇikapupphehi, pūjayanti narāsabhaṃ.
27. “Aho acchariyaṃ loke, abbhutaṃ lomahaṃsanaṃ;
Na medisaṃ bhūtapubbaṃ, accheraṃ lomahaṃsanaṃ”.
28. Sakasakamhi bhavane, nisīditvāna devatā;
Hasanti tā mahāhasitaṃ, disvānaccherakaṃ nabhe.
29. Ākāsaṭṭhā ca bhūmaṭṭhā, tiṇapanthanivāsino;
Katañjalī namassanti, tuṭṭhahaṭṭhā pamoditā.
30. Yepi dīghāyukā nāgā, puññavanto mahiddhikā;
Pamoditā namassanti, pūjayanti naruttamaṃ.

31. Saṅgītiyo pavattenti, ambare anilañjase;
Cammanaddhāni vādenti, disvānaccherakaṃ nabhe.
32. Saṅkhā ca paṇavā ceva, athopi ḍiṇḍimā [ḍeṇḍimā (sī.)] bahū;
Antalikkhasmiṃ vajjanti, disvānaccherakaṃ nabhe.
33. Abbhuto vata no ajja, uppajji lomahaṃsano;
Dhuvamatthasiddhiṃ labhāma, khaṇo no paṭipādito.
34. Buddhoti tesam sutvāna, pīti uppajji tāvade;
Buddho buddhoti kathayantā, tiṭṭhanti pañjalikatā.
35. Hiṅkārā sādhuḅkārā ca [hiṅkāraṃ sādhuḅkārāṅca (sī. syā.)], ukkuṭṭhi sampahaṃsanaṃ
[sampaśādanaṃ (sī.), sampanādanaṃ (syā.)];
Pajā ca vividhā gagane, vattenti pañjalikatā.
36. Gāyanti seḷenti ca vādayanti ca, bhujāni pothenti ca naccayanti ca;
Muñcanti pupphaṃ pana pañcavaṇṇikaṃ, mandāraṃ candanacuṇṇamissitaṃ.
37. “Yathā tuyhaṃ mahāvīra, pādesu cakkalakkhaṇaṃ;
Dhajavajirapaṭākā, vaḍḍhamānaṅkusācitaṃ.
38. “Rūpe sīle samādhimhi, paññāya ca asādiso;
Vimuttiyā asamasamo, dhammacakkappavattane.
39. “Dasanāgabalaṃ kāye, tuyhaṃ pākatikaṃ balaṃ;
Iddhibalena asamo, dhammacakkappavattane.
40. “Evaṃ sabbaguṇūpetam, sabbaṅgasamupāgataṃ;
Mahāmunim kārūnikaṃ, lokanāthaṃ namassatha.
41. “Abhivādanaṃ thomanañca, vandanañca pasamaṇaṃ;
Namassanañca pūjañca, sabbaṃ arahasī tuvaṃ.
42. “Ye keci loke vandaneyyā, vandanaṃ arahanti ye;
Sabbasetṭho mahāvīra, sadiso te na vijjati.
43. “Sāriputto mahāpañño, samādhijjhānakovido;
Gijjhakūṭe ṭhitoyeva, passati lokanāyakaṃ.
44. “Suphullaṃ sālārājaṃva, candaṃva gagane yathā;
Majjhanhikeva [majjhantikeva (sabbattha)] sūriyaṃ, olokesi narāsabhaṃ.
45. “Jalantaṃ dīparukkhaṃva, taruṇasūriyaṃva uggataṃ;
Byāmapabhānurañjitaṃ, dhīraṃ passati lokanāyakaṃ.
46. “Pañcannaṃ bhikkhusatānaṃ, katakiccāna tādinaṃ;
Khīṇāsavānaṃ vimalānaṃ, khaṇena sannipātayi.
47. “Lokappasādanaṃ nāma, pāṭihīraṃ nidassayi;
Amhepi tattha gantvāna, vandissāma mayaṃ jinaṃ.

48. “Etha sabbe gamissāma, pucchissāma mayaṃ jinaṃ;
Kaṅkhaṃ vinodayissāma, passitvā lokanāyakaṃ”.
49. Sādhūti te paṭissutvā, nipakā saṃvutindriyā;
Pattacīvaramādāya, taramānā upāgamuṃ.
50. Khīṇāsavehi vimalehi, dantehi uttame dame;
Sāriputto mahāpañño, iddhiyā upasaṅkama.
51. Tehi bhikkhūhi parivuto, sāriputto mahāgaṇī;
Laṅanto devova gagane, iddhiyā upasaṅkama.
52. Ukkāsitañca khipitaṃ [ukkāsitañca khipitañca (syā. aṭṭha.)], ajjupekkhiya subbatā;
Sagāravā sappatissā, sambuddhaṃ upasaṅkamuṃ.
53. Upasaṅkamtivā passanti, sayambhuṃ lokanāyakaṃ;
Nabhe accuggataṃ dhīraṃ, candaṃva gagane yathā.
54. Jalantaṃ dīparukkhaṃva, vijjuṃva gagane yathā;
Majjhanhikeva sūriyaṃ, passanti lokanāyakaṃ.
55. Pañcabhikkhusatā sabbe, passanti lokanāyakaṃ;
Rahadamiva vipasannaṃ, suphullaṃ padumaṃ yathā.
56. Añjaliṃ paggahetvāna, tuṭṭhahaṭṭhā pamoditā;
Namassamānā nipatanti, satthuno cakkalakkhaṇe.
57. Sāriputto mahāpañño, koraṇḍasamasādiso;
Samādhijjhānakusalo, vandate lokanāyakaṃ.
58. Gajjitā kālameghova, nīluppalasamasādiso;
Iddhibalena asamo, moggallāno mahiddhiko.
59. Mahākassapopi ca thero, uttattakanakasannibho;
Dhutaguṇe agganikkhitto, thomito satthuvaṇṇito.
60. Dibbacakkhūnaṃ yo aggo, anuruddho mahāgaṇī;
Ñātiseṭṭho bhagavato, avidūreva tiṭṭhati.
61. Āpattianāpattiyā, satekicchāya kovido;
Vinaye agganikkhitto, upāli satthuvaṇṇito.
62. Sukhumanipuṇatthapaṭividdho, kathikānaṃ pavaro gaṇī;
Isi mantāniyā putto, puṇṇo nāmāti vissuto.
63. Etesaṃ cittamaññāya, opammakusalo muni;
Kaṅkhacchedo mahāvīro, kathesi attano guṇaṃ.
64. “Cattāro te asaṅkheyyā, koṭi yesaṃ na nāyati;
Sattakāyo ca ākāso, cakkavālā canantakā;
Buddhañāṇaṃ appameyyaṃ, na sakkā ete vijānituṃ.

65. “Kimetaṃ acchariyaṃ loke, yaṃ me iddhivikubbanāṃ;
Aññe bahū acchariyā, abbhutā lomahaṃsanā.
66. “Yadāhaṃ tusite kāye, santusito nāmaṃ tadā;
Dasasahassī samāgama, yācanti pañjalī mamaṃ.
67. ““Kālo kho te [kālo deva (sī.), kāloyaṃ te (syā. ka.)] mahāvīra, uppajja mātukucchiyaṃ;
Sadevakaṃ tārayanto, bujjhassu amataṃ padaṃ’.
68. “Tusitā kāyā cavitvāna, yadā okkami kucchiyaṃ;
Dasasahassīlokadhātu, kampittha dharaṇī tadā.
69. “Yadāhaṃ mātukucchito, sampajānova nikkhamiṃ;
Sādhukāraṃ pavattenti, dasasahassī pakampatha.
70. “Okkantiṃ me samo natthi, jātito abhinikkhame;
Sambodhiyaṃ ahaṃ seṭṭho, dhammacakkappavattane.
71. “Aho acchariyaṃ loke, buddhānaṃ guṇamahantatā;
Dasasahassīlokadhātu, chappakāraṃ pakampatha;
Obhāso ca mahā āsi, accheraṃ lomahaṃsanāṃ’.
72. Bhagavā tamhi [bhagavā ca tamhi (sī. syā. ka.)] samaye, lokajetṭho narāsabho;
Sadevakaṃ dassayanto, iddhiyā caṅkamī jino.
73. Caṅkame caṅkamantova, kathesi lokanāyako;
Antarā na nivatteti, catuhatthe caṅkame yathā.
74. Sāriputto mahāpañño, samādhijjhānakovido;
Paññāya pāramippatto, pucchati lokanāyakaṃ.
75. “Kīdiso te mahāvīra, abhinīhāro naruttama;
Kamhi kāle tayā dhīra, patthitā bodhimuttamā.
76. “Dānaṃ sīlañca nekkhammaṃ, paññāvīriyañca kīdisaṃ;
Khantisaccamadhiṭṭhānaṃ, mettupekkhā ca kīdisā.
77. “Dasa pāramī tayā dhīra, kīdisī lokanāyaka;
Kathaṃ upapāramī puṇṇā, paramatthapāramī kathaṃ’.
78. Tassa puṭṭho viyākāsi, karavīkamadhuragiṃ;
Nibbāpayanto hadayaṃ, hāsayaṃ sadevakaṃ.
79. Atītabuddhānaṃ jinānaṃ desitaṃ, nikīlitaṃ [nikīlitaṃ (ka.)] buddhaparamparāgataṃ;
Pubbenivāsānugatāya buddhiyā, pakāsayaī lokahitaṃ sadevake.
80. “Pītipāmojjajanaṃ, sokasallavinodanaṃ;
Sabbasampattiṭṭhānaṃ, cittīkatvā suṇātha me.
81. “Madanimmadanaṃ sokaṇudaṃ, saṃsāraparimocanaṃ;
Sabbadukkhakkhayaṃ maggaṃ, sakkaccaṃ paṭipajjathā’

Ratanacaṅkamanakaṅḍo niṭṭhito.

2. Sumedhapatthanākathā

1. Kappe ca satasahassee, caturo ca asaṅkhiye;
Amarañ nāma nagaraṃ, dassaneyyaṃ manoramaṃ.
2. Dasahi saddehi avivittaṃ, annapānasamāyutaṃ;
Hatthisaddaṃ assasaddaṃ, bherisaṅkharathāni ca;
Khādatha pivatha ceva, annapānena ghoṣitaṃ.
3. Nagaraṃ sabbaṅgasampannaṃ, sabbakammamupāgataṃ;
Sattaratanasampannaṃ, nānājanasamākulāṃ;
Samiddhaṃ devanagaraṃva, āvāsaṃ puññakammaṃ.
4. Nagare amaravatiyā, sumedho nāma brāhmaṇo;
Anekakoṭisannicayo, pahūtaḍḍhanadhaññavā.
5. Ajjhāyako mantadharo, tiṇṇaṃ vedāna pāragū;
Lakkhaṇe itihāse ca, sadhamme pāramaṃ gato.
6. Rahogato nisīditvā, evaṃ cintesahaṃ tadā;
“Dukkho punabbhavo nāma, sarīrassa ca bhedaṃ.
7. “Jātidhammo jarādhammo, byādhidhammo sahaṃ [cahaṃ (sī. syā.)] tadā;
Ajaraṃ amataṃ khemaṃ, pariyesissāmi nibbutiṃ.
8. “Yaṃnūnimaṃ pūtikāyaṃ, nānākuṇapapūritaṃ;
Chaḍḍayitvāna gaccheyyaṃ, anapekkho anattiko.
9. “Atthi hehiti so maggo, na so sakkā na hetuye;
Pariyesissāmi taṃ maggaṃ, bhavato parimuttiyā.
10. “Yathāpi dukkhe vijjante, sukhaṃ nāmapi vijjati;
Evaṃ bhava vijjamāne, vibhavopi icchitabbako.
11. “Yathāpi uṇhe vijjante, aparaṃ vijjati sītaṃ;
Evaṃ tividhaggi vijjante, nibbānaṃ icchitabbakaṃ.
12. “Yathāpi pāpe vijjante, kalyāṇamapi vijjati;
Evameva jāti vijjante, ajātipicchitabbakaṃ.
13. “Yathā gūthagato puriso, taḷākaṃ disvāna pūritaṃ;
Na gavesati taṃ taḷākaṃ, na doso taḷākassa so.
14. “Evaṃ kilesamaladhova, vijjante amatantaḷe;
Na gavesati taṃ taḷākaṃ, na doso amatantaḷe.
15. “Yathā arīhi pariruddho, vijjante gamanampathe;
Na palāyati so puriso, na doso añjasassa so.

16. “Evaṃ kilesapariruddho, vijjamāne sive pathe;
Na gavesati taṃ maggaṃ, na doso sivamañjase.
17. “Yathāpi byādhito puriso, vijjamāne tikicchake;
Na tikicchāpeti taṃ byādhiṃ, na doso so tikicchake.
18. “Evaṃ kilesabyādhīhi, dukkhito paripīlito;
Na gavesati taṃ ācariyaṃ, na doso so vināyake.
19. “Yathāpi kuṇapaṃ puriso, kaṅṅhe bandhaṃ jigucchiya;
Mocayitvāna gaccheyya, sukhī serī sayamaṃvasī.
20. “Tathevimaṃ pūtikāyaṃ, nānākuṇapasañcayāṃ;
Chaddayitvāna gaccheyyaṃ, anapekkho anattiko.
21. “Yathā uccāraṭṭhānamhi, karīsaṃ naranāriyo;
Chaddayitvāna gacchanti, anapekkhā anattikā.
22. “Evamevāhaṃ imaṃ kāyaṃ, nānākuṇapapūritaṃ;
Chaddayitvāna gacchissaṃ, vaccaṃ katvā yathā kuṭiṃ.
23. “Yathāpi jajjaraṃ nāvaṃ, paluggaṃ udagāhiniṃ [[udakagāhiniṃ \(sī.\)](#), [udakagāhiniṃ \(syā.\)](#)];
Sāmī chaḍḍetvā gacchanti, anapekkhā anattikā.
24. “Evamevāhaṃ imaṃ kāyaṃ, navacchiddaṃ dhuvassavaṃ;
Chaddayitvāna gacchissaṃ, jiṇṇanāvaṃva sāmikā.
25. “Yathāpi puriso corehi, gacchanto bhaṇḍamādiya;
Bhaṇḍacchedabhayaṃ disvā, chaḍḍayitvāna gacchati.
26. “Evameva ayaṃ kāyo, mahācorasamo viya;
Pahāyimaṃ gamissāmi, kusalacchedanā bhayā”.
27. Evāhaṃ cintayitvāna, nekakoṭisataṃ dhanāṃ;
Nāthānāthānaṃ datvāna, himavantamupāgamiṃ.
28. Himavantassāvidūre, dhammiko nāma pabbato;
Assamo sukato mayhaṃ, paṇṇasālā sumāpitā.
29. Caṅkamaṃ tattha māpesiṃ, pañcadosavivajjitaṃ;
Aṭṭhaguṇasamūpetāṃ, abhiññābalaṃmāhariṃ.
30. Sāṭakaṃ pajahiṃ tattha, navadosamupāgataṃ;
Vākacīraṃ nivāsesiṃ, dvādasaguṇamupāgataṃ.
31. Aṭṭhadosasamākiṇṇaṃ, pajahiṃ paṇṇasālakaṃ;
Upāgamiṃ rukkhamaṃ, guṇe dasahupāgataṃ.
32. Vāpitaṃ ropitaṃ dhaññaṃ, pajahiṃ niravasesato;
Anekaguṇasampannaṃ, pavattaphalamādiyimaṃ.
33. Tatthappadhānaṃ padahiṃ, nisajjattāhānacaṅkame;

Abbhantaramhi sattāhe, abhiññābalapāpuṇiṃ.

34. Evaṃ me siddhipattassa, vasībhūtassa sāsane;
Dīpaṅkaro nāma jīno, uppajji lokanāyako.
35. Uppajjante ca jāyante, bujjhante dhammadesane;
Caturō nimitte nāddasaṃ, jhānaratisamappito.
36. Paccantadesavisaye, nimantetvā tathāgataṃ;
Tassa āgamaṇaṃ maggaṃ, sodhenti tuṭṭhamānasā.
37. Ahaṃ tena samayena, nikkhamitvā sakassamā;
Dhunanto vākacīrāni, gacchāmi ambare tadā.
38. Vedajātaṃ jaṇaṃ disvā, tuṭṭhahaṭṭhaṃ pamoditaṃ;
Orohitvāna gaganā, manusse pucchi tāvade.
39. “Tuṭṭhahaṭṭho pamudito, vedajāto mahājano;
Kassa sodhīyati maggo, añjasaṃ vaṭumāyanaṃ”.
40. Te me puṭṭhā viyākamsu, “buddho loke anuttaro;
Dīpaṅkaro nāma jīno, uppajji lokanāyako;
Tassa sodhīyati maggo, añjasaṃ vaṭumāyanaṃ”.
41. Buddhotivacanaṃ [[buddhoti mama \(sī. syā. ka.\)](#)] sutvāna, pīti uppajji tāvade;
Buddho buddhoti kathayanto, somanassaṃ pavedayaṃ.
42. Tattha ṭhatvā vicintesiṃ, tuṭṭho saṃviggamānaso;
“Idha bījāni ropissaṃ, khaṇo ve mā upaccagā.
43. “Yadi buddhassa sodhetha, ekokāsaṃ dadātha me;
Ahampi sodhayissāmi, añjasaṃ vaṭumāyanaṃ”.
44. Adamsu te mamokāsaṃ, sodhetuṃ añjasaṃ tadā;
Buddho buddhoti cintento, maggaṃ sodhemahaṃ tadā.
45. Aniṭṭhite mamokāse, dīpaṅkaro mahāmuni;
Catūhi satahassehi, chaḷabhiññehi tādihi;
Khīṇāsavehi vimalehi, paṭipajji añjasaṃ jīno.
46. Paccuggamaṇā vattanti, vajjanti bheriyo bahū;
Āmoditā naramarū, sādhuḷkāraṃ pavattayaṃ.
47. Devā manusse passanti, manussāpi ca devatā;
Ubhōpi te pañjalikā, anuyanti tathāgataṃ.
48. Devā dibbehi turiyehi, manussā mānusehi ca [[mānussakehi ca mānusakehi ca \(syā. ka.\)](#)];
Ubhōpi te vajjayantā, anuyanti tathāgataṃ.
49. Dibbaṃ mandāraṃ pupphaṃ, padumaṃ pārichattakaṃ;
Disodisaṃ okiranti, ākāsanabhagatā marū.

50. Dibbaṃ candanacuṇṇaṇca, varagandhaṇca kevalaṃ;
Disodisaṃ okiranti, ākāsanabhagatā [ākāse nabhagā (syā.)] marū.
51. Campakaṃ saralaṃ nīpaṃ, nāgapunnāgaketakaṃ;
Disodisaṃ ukkhipanti, bhūmitalagatā narā.
52. Kese muñcitvāhaṃ tattha, vācacīraṇca cammakāṃ;
Kalale pattharivāna, avakujjo nipajjahaṃ.
53. “Akkamitvāna maṃ buddho, saha sissehi gacchatu;
Mā naṃ kalale akkamittha, hitāya me bhavissati”.
54. Pathaviyaṃ nipannassa, evaṃ me āsi cetaso;
“Icchamāno ahaṃ ajja, kilese jhāpaye mama.
55. “Kiṃ me aññāta-vesena, dhammaṃ sacchikatenidha;
Sabbaññutaṃ pāpuṇitvā, buddho hessaṃ sadevake.
56. “Kiṃ me ekena tiṇṇena, purisena thāmadassinā;
Sabbaññutaṃ pāpuṇitvā, santāressaṃ sadevakaṃ.
57. “Iminā me adhikārena, katena purisuttame;
Sabbaññutaṃ pāpuṇitvā, tāremi janataṃ bahuṃ.
58. “Samsārasotaṃ chinditvā, viddhamsetvā tayo bhave;
Dhammanāvaṃ samāruyha, santāressaṃ sadevakaṃ”.
59. Manussattaṃ liṅgasampatti, hetu satthāradassanaṃ;
Pabbajjā guṇasampatti, adhikāro ca chandatā;
Aṭṭhadhammasamodhānā, abhinīhāro samijjhati.
60. Dīpaṅkaro lokavidū, āhutiṇaṃ paṭiggaho;
Ussīsake maṃ ṭhatvāna, idaṃ vacanamabravi.
61. “Passatha imaṃ tāpasāṃ, jaṭilaṃ uggatāpanaṃ;
Aparimeyyito kappe, buddho loke bhavissati.
62. “Ahu kapilavhayā rammā, nikkhamitvā tathāgato;
Padhānaṃ padahitvāna, katvā dukkarakārikaṃ.
63. “Ajapālarukkhamūlasmiṃ, nisīditvā tathāgato;
Tattha pāyāsaṃ paggayha, nerañjaramupehiti.
64. “Nerañjarāya tīramhi, pāyāsaṃ ada so jino;
Paṭiyattavaramaggena, bodhimūlamupehiti.
65. “Tato padakkhiṇaṃ katvā, bodhimaṇḍaṃ anuttaro [anuttaraṃ (syā. kaṃ.)];
Assattharukkhamūlamhi, bujjhissati mahāyaso.
66. “Imassa janikā mātā, māyā nāma bhavissati;
Pitā suddhodano nāma, ayaṃ hessati gotamo.

67. “Anāsavā vītarāgā, santacittā samāhitā;
Kolito upatisso ca, aggā hessanti sāvakā;
Ānando nāmupaṭṭhāko, upaṭṭhissatimaṃ [upaṭṭhissati taṃ (sī.)] jinaṃ.
68. “Khemā uppalavaṇṇā ca, aggā hessanti sāvikā;
Anāsavā vītarāgā, santacittā samāhitā;
Bodhi tassa bhagavato, assatthoti pavuccati.
69. “Citto ca hatthāḷavako [hatthāḷavako (sī.)], aggā hessantupaṭṭhakā;
Uttarā nandamātā ca, aggā hessantupaṭṭhikā”.
70. Idamaṃ sutvāna vacanaṃ, asamassa mahesino;
Āmoditā naramarū, buddhabhījaṃ kira [buddhabhījaṃkuro (sī. syā.)] ayaṃ.
71. Ukkuṭṭhisaddā vattanti, apphoṭenti [apphoṭenti (sī.)] hasanti ca;
Katañjalī namassanti, dasasahassī sadevakā.
72. “Yadimassa lokanāthassa, virajjhissāma sāsanaṃ;
Anāgatamhi addhāne, hessāma sammukhā imaṃ.
73. “Yathā manussā nadimā tarantā, paṭitthamaṃ virajjhiya;
Heṭṭhātitha gahetvāna, uttaranti mahānadimā.
74. “Evameva mayaṃ sabbe, yadi muñcāmimaṃ jinaṃ;
Anāgatamhi addhāne, hessāma sammukhā imaṃ”.
75. Dīpaṅkaro lokavidū, āhutaṃ paṭiggaho;
Mama kammaṃ pakittetvā, dakkhiṇaṃ pādamuddhari.
76. Ye tathāsuṃ jinaputtā, padakkhiṇamakamsu [sabbe padakkhiṇamakamsu (syā. ka.)] maṃ;
Devā manussā asurā ca, abhivādetvāna pakkamaṃ.
77. Dassanaṃ me atikkante, sasaṅghe lokanāyake;
Sayanā vuṭṭhahitvāna, pallaṅkaṃ ābhujimā tadā.
78. Sukhena sukhito homi, pāmojjena pamodito;
Pītiyā ca abhissanno, pallaṅkaṃ ābhujimā tadā.
79. Pallaṅkena nisīditvā, evaṃ cintesamaṃ tadā;
“Vasībhūto ahaṃ jhāne, abhiññāsu pāramiṃgato [abhiññāpāramiṃ gato (sī.)].
80. “Sahassiyamhi lokamhi, isayo natthi me samā;
Asamo iddhidhammesu, alabhimā īdisamaṃ sukhaṃ.
81. “Pallaṅkābhujane mayhaṃ, dasasahassādhivāsino;
Mahānādaṃ pavattesaṃ, ‘dhuvaṃ buddho bhavissasi.
82. “Yā pubbe bodhisattānaṃ, pallaṅkavaramābhujē;
Nimittāni padissanti, tāni ajja padissare.
83. “Sītaṃ byapagataṃ hoti, uṇhañca upasammati;
Tāni ajja padissanti, dhuvaṃ buddho bhavissasi.

84. ““Dasasahassī lokadhātū, nissaddā honti nirākulā;
Tāni ajja padissanti, dhuvaṃ buddho bhavissasi.
85. ““Mahāvātā na vāyanti, na sandanti savantiyo;
Tāni ajja padissanti, dhuvaṃ buddho bhavissasi.
86. ““Thalajā dakajā pupphā, sabbe pupphanti tāvade;
Tepajja pupphitā [pupphitāni (aṭṭha.)] sabbe, dhuvaṃ buddho bhavissasi.
87. ““Latā vā yadi vā rukkhā, phalabhārā honti tāvade;
Tepajja phalitā sabbe, dhuvaṃ buddho bhavissasi.
88. ““Ākāsaṭṭhā ca bhūmaṭṭhā, ratanā jotanti tāvade;
Tepajja ratanā jotanti, dhuvaṃ buddho bhavissasi.
89. ““Mānussakā ca dibbā ca, turiyā vajjanti tāvade;
Tepajjubho abhiravanti, dhuvaṃ buddho bhavissasi.
90. ““Vicitrapupphā gaganā, abhivassanti tāvade;
Tepi ajja pavassanti, dhuvaṃ buddho bhavissasi.
91. ““Mahāsamuddo ābhujati, dasasahassī pakampati;
Tepajjubho abhiravanti, dhuvaṃ buddho bhavissasi.
92. ““Nirayepi dasasahasse, aggī nibbanti tāvade;
Tepajja nibbutā aggī, dhuvaṃ buddho bhavissasi.
93. ““Vimalo hoti sūriyo, sabbā dissanti tārakā;
Tepi ajja padissanti, dhuvaṃ buddho bhavissasi.
94. ““Anovaṭṭhena [anovuṭṭhena (syā. ka.)] udakaṃ, mahiyā ubbhijji tāvade;
Tampajjubbhijjate mahiyā, dhuvaṃ buddho bhavissasi.
95. ““Tārāgaṇā virocanti, nakkhattā gaganamaṇḍale;
Visākhā candimā yuttā, dhuvaṃ buddho bhavissasi.
96. ““Bilāsayā darīsayā, nikkhamanti sakāsayā;
Tepajja āsayā chuddhā, dhuvaṃ buddho bhavissasi.
97. ““Na honti aratī sattānaṃ, santuṭṭhā honti tāvade;
Tepajja sabbe santuṭṭhā, dhuvaṃ buddho bhavissasi.
98. ““Rogā tadupasammanti, jighacchā ca vinassati;
Tāni ajja padissanti, dhuvaṃ buddho bhavissasi.
99. ““Rāgo tadā tanu hoti, doso moho vinassati;
Tepajja vigatā sabbe, dhuvaṃ buddho bhavissasi.
100. ““Bhayaṃ tadā na bhavati, ajjapetaṃ padissati;
Tena liṅgena jānāma, dhuvaṃ buddho bhavissasi.
101. ““Rajonuddhamṣati uddham, ajjapetaṃ padissati;

Tena liṅgena jānāma, dhuvam buddho bhavissasi.

102. ““Aniṭṭhagandho pakkamati, dibbagandho pavāyati;
Sopajja vāyati gandho, dhuvam buddho bhavissasi.
103. ““Sabbe devā padissanti, ṭhapayitvā arūpino;
Tepajja sabbe dissanti, dhuvam buddho bhavissasi.
104. ““Yāvatā nirayā nāma, sabbe dissanti tāvade;
Tepajja sabbe dissanti, dhuvam buddho bhavissasi.
105. ““Kuṭṭā [kuḍḍā (sī.)] kavāṭa selā ca, na hontāvaraṇā tadā;
Ākāsabhūtā tepajja, dhuvam buddho bhavissasi.
106. ““Cutī ca upapatti ca, khaṇe tasmim na vijjati;
Tānipajja padissanti, dhuvam buddho bhavissasi.
107. ““Daḷham paggaṇha vīriyam, mā nivatta abhikkama;
Mayampetaṃ vijānāma, dhuvam buddho bhavissasi””.
108. Buddhassa vacanam sutvā, dasasahassīnacūbhayaṃ;
Tuṭṭhahaṭṭho pamodito, evaṃ cintesahaṃ tadā.
109. ““Advejjhavacanā buddhā, amoghavacanā jinā;
Vitathaṃ natthi buddhānaṃ, dhuvam buddho bhavāmahaṃ.
110. ““Yathā khittaṃ nabhe leḍḍu, dhuvam patati bhūmiyam;
Tattheva buddhaseṭṭhānaṃ, vacanaṃ dhuvasassataṃ;
Vitathaṃ natthi buddhānaṃ, dhuvam buddho bhavāmahaṃ.
111. ““Yathāpi sabbasattānaṃ, maraṇaṃ dhuvasassataṃ;
Tattheva buddhaseṭṭhānaṃ, vacanaṃ dhuvasassataṃ;
Vitathaṃ natthi buddhānaṃ, dhuvam buddho bhavāmahaṃ.
112. ““Yathā rattikkhaye patte, sūriyuggamaṃ dhuvam;
Tattheva buddhaseṭṭhānaṃ, vacanaṃ dhuvasassataṃ;
Vitathaṃ natthi buddhānaṃ, dhuvam buddho bhavāmahaṃ.
113. ““Yathā nikkhantasayanassa, sīhassa nadanaṃ dhuvam;
Tattheva buddhaseṭṭhānaṃ, vacanaṃ dhuvasassataṃ;
Vitathaṃ natthi buddhānaṃ, dhuvam buddho bhavāmahaṃ.
114. ““Yathā āpannasattānaṃ, bhāramoropanaṃ dhuvam;
Tattheva buddhaseṭṭhānaṃ, vacanaṃ dhuvasassataṃ;
Vitathaṃ natthi buddhānaṃ, dhuvam buddho bhavāmahaṃ.
115. ““Handa buddhakare dhamme, vicināmi ito cito;
Uddham adho dasa disā, yāvatā dhammadhātuyā””.
116. Vicinanto tadā dakkhiṃ, paṭhamaṃ dānapāramiṃ;
Pubbakehi mahesīhi, anuciṇṇaṃ mahāpathaṃ.

117. “Imaṃ tvaṃ paṭhamaṃ tāva, daḷhaṃ katvā samādiya;
Dānapāramitaṃ gaccha, yadi bodhiṃ pattumicchasi.
118. “Yathāpi kumbho sampuṇṇo, yassa kassaci adho kato;
Vamate vudakaṃ nissesaṃ, na tattha parirakkhati.
119. “Tatheva yācake disvā, hīnamukkaṭṭhamajjhime;
Dadāhi dānaṃ nissesaṃ, kumbho viya adho kato.
120. “Nahete ettakāyeva, buddhadhammā bhavissare;
Aññepi vicinissāmi, ye dhammā bodhipācanā”.
121. Vicinanto tadā dakkhiṃ, dutiyaṃ sīlapāramiṃ;
Pubbakehi mahesīhi, āsevitānisevitaṃ.
122. “Imaṃ tvaṃ dutiyaṃ tāva, daḷhaṃ katvā samādiya;
Sīlapāramitaṃ gaccha, yadi bodhiṃ pattumicchasi.
123. “Yathāpi camarī vālaṃ, kismiñci paṭilaggitaṃ;
Upeti maraṇaṃ tattha, na vikopeti vāladhiṃ.
124. “Tatheva tvaṃ catūsu bhūmīsū, sīlāni paripūraya;
Parirakkha sabbadā sīlaṃ, camarī viya vāladhiṃ.
125. “Nahete ettakāyeva, buddhadhammā bhavissare;
Aññepi vicinissāmi, ye dhammā bodhipācanā”.
126. Vicinanto tadā dakkhiṃ, tatiyaṃ nekkhammapāramiṃ;
Pubbakehi mahesīhi, āsevitānisevitaṃ.
127. “Imaṃ tvaṃ tatiyaṃ tāva, daḷhaṃ katvā samādiya;
Nekkhāmapāramitaṃ gaccha, yadi bodhiṃ pattumicchasi.
128. “Yathā andughare puriso, ciravuttho dukhaṭṭito;
Na tattha rāgaṃ janesi, muttiṃyeva gavesati.
129. “Tatheva tvaṃ sabbabhava, passa andughare viya;
Nekkhāmmābhimukho hohi, bhavato parimuttiyā.
130. “Nahete ettakāyeva, buddhadhammā bhavissare;
Aññepi vicinissāmi, ye dhammā bodhipācanā”.
131. Vicinanto tadā dakkhiṃ, catutthaṃ paññāpāramiṃ;
Pubbakehi mahesīhi, āsevitānisevitaṃ.
132. “Imaṃ tvaṃ catutthaṃ tāva, daḷhaṃ katvā samādiya;
Paññāpāramitaṃ gaccha, yadi bodhiṃ pattumicchasi.
133. “Yathāpi bhikkhu bhikkhanto, hīnamukkaṭṭhamajjhime;
Kulāni na vivajjento, evaṃ labhati yāpanaṃ.
134. “Tatheva tvaṃ sabbakālaṃ, paripucchaṃ budhaṃ janāṃ;

- Paññāpāramitaṃ gantvā, sambodhiṃ pāpuṇissasi.
135. “Nahete ettakāyeva, buddhadhammā bhavissare;
Aññēpi vicinissāmi, ye dhammā bodhipācanā”.
136. Vicinanto tadā dakkhiṃ, pañcamaṃ vīriyapāramiṃ;
Pubbakehi mahesīhi, āsevanisevitaṃ.
137. “Imaṃ tvaṃ pañcamaṃ tāva, daḷhaṃ katvā samādiya;
Vīriyapāramitaṃ gaccha, yadi bodhiṃ pattumicchasi.
138. “Yathāpi sīho migarājā, nisajjattḥānacānkame;
Alīnavīriyo hoti, paggahitamano sadā.
139. “Tatheva tvaṃ [tvampi (sī.)] sabbabhava, paggaṇha vīriyaṃ daḷhaṃ;
Vīriyapāramitaṃ gantvā, sambodhiṃ pāpuṇissasi.
140. “Nahete ettakāyeva, buddhadhammā bhavissare;
Aññēpi vicinissāmi, ye dhammā bodhipācanā”.
141. Vicinanto tadā dakkhiṃ, chaṭṭhamaṃ khantipāramiṃ;
Pubbakehi mahesīhi, āsevanisevitaṃ.
142. “Imaṃ tvaṃ chaṭṭhamaṃ tāva, daḷhaṃ katvā samādiya;
Tattha advejjhamānaso, sambodhiṃ pāpuṇissasi.
143. “Yathāpi pathavī nāma, sucimpi asucimpi ca;
Sabbam sahati nikkhepaṃ, na karoti paṭighaṃ tayā.
144. “Tatheva tvampi sabbesaṃ, sammānāvamānakkhamo;
Khantipāramitaṃ gantvā, sambodhiṃ pāpuṇissasi.
145. “Nahete ettakāyeva, buddhadhammā bhavissare;
Aññēpi vicinissāmi, ye dhammā bodhipācanā”.
146. Vicinanto tadā dakkhiṃ, sattamaṃ saccapāramiṃ;
Pubbakehi mahesīhi, āsevanisevitaṃ.
147. “Imaṃ tvaṃ sattamaṃ tāva, daḷhaṃ katvā samādiya;
Tattha advejjhavacano, sambodhiṃ pāpuṇissasi.
148. “Yathāpi osadhī nāma, tulābhūtā sadevake;
Samaye utuvasse vā, na vokkamati vīthito.
149. “Tatheva tvampi saccesu, mā vokkama hi vīthito;
Saccapāramitaṃ gantvā, sambodhiṃ pāpuṇissasi.
150. “Nahete ettakāyeva, buddhadhammā bhavissare;
Aññēpi vicinissāmi, ye dhammā bodhipācanā”.
151. Vicinanto tadā dakkhiṃ, aṭṭhamaṃ adhiṭṭhānapāramiṃ;
Pubbakehi mahesīhi, āsevanisevitaṃ.

152. “Imaṃ tvaṃ aṭṭhamaṃ tāva, daḷhaṃ katvā samādiya;
Tattha tvaṃ acalo hutvā, sambodhiṃ pāpuṇissasi.
153. “Yathāpi pabbato selo, acalo suppatiṭṭhito;
Na kampaṭi bhusavātehi, sakaṭṭhāneva tiṭṭhati.
154. “Tattheva tvampi adhiṭṭhāne, sabbadā acalo bhava;
Adhiṭṭhānapāramitaṃ gantvā, sambodhiṃ pāpuṇissasi.
155. “Nahete ettakāyeva, buddhadhammā bhavissare;
Aññepi vicinissāmi, ye dhammā bodhipācanā”.
156. Vicinanto tadā dakkhiṃ, navamaṃ mettāpāramiṃ;
Pubbakehi mahesīhi, āsevitānisevitaṃ.
157. “Imaṃ tvaṃ navamaṃ tāva, daḷhaṃ katvā samādiya;
Mettāya asamo hohi, yadi bodhiṃ pattumicchasi.
158. “Yathāpi udakaṃ nāma, kalyāṇe pāpake jane;
Samaṃ pharati sītena, pavāheti rajomalaṃ.
159. “Tattheva tvaṃ hitāhite, samaṃ mettāya bhāvaya;
Mettāpāramitaṃ gantvā, sambodhiṃ pāpuṇissasi.
160. “Nahete ettakāyeva, buddhadhammā bhavissare;
Aññepi vicinissāmi, ye dhammā bodhipācanā”.
161. Vicinanto tadā dakkhiṃ, dasamaṃ upekkhāpāramiṃ;
Pubbakehi mahesīhi, āsevitānisevitaṃ.
162. “Imaṃ tvaṃ dasamaṃ tāva, daḷhaṃ katvā samādiya;
Tulābhūto daḷho hutvā, sambodhiṃ pāpuṇissasi.
163. “Yathāpi pathavī nāma, nikkhittaṃ asuciṃ suciṃ;
Upekkhati ubhopete, kopānunayavajjitā.
164. “Tattheva tvaṃ sukhadukkhe, tulābhūto sadā bhava;
Upekkhāpāramitaṃ gantvā, sambodhiṃ pāpuṇissasi.
165. “Ettakāyeva te loke, ye dhammā bodhipācanā;
Tatuddhaṃ natthi aññātra, daḷhaṃ tattha patiṭṭhaha”.
166. Ime dhamme sammasato, sabhāvasarasalakkhaṇe;
Dhammatejēna vasudhā, dasasahassī pakampatha.
167. Calatī ravatī pathavī, ucchuyantaṃva pīḷitaṃ;
Telayante yathā cakkaṃ, evaṃ kampaṭi medanī.
168. Yāvataṃ parisā āsi, buddhassa parivesane;
Pavedhamānā sā tattha, mucchitā seti bhūmiyaṃ.
169. Ghaṭānekasahassāni, kumbhīnaṅca satā bahū;

Sañcuṇṇamathitā tattha, aññamaññaṃ paghaṭṭitā.

170. Ubbiggā tasitā bhītā, bhantā byāthitamānasā;
Mahājanā samāgamma, dīpaṅkaramupāgamuṃ.
171. “Kiṃ bhavissati lokassa, kalyāṇamatha pāpakam;
Sabbo upadduto loko, taṃ vinodehi cakkhuma”.
172. Tesam tadā saññāpesi, dīpaṅkaro mahāmuni;
“Visaṭṭhā hotha mā bhetha [bhātha (sabbattha)], imasmim pathavikampane.
173. “Yamahaṃ ajja byākāsim, buddho loko bhavissati;
Eso sammasati dhammaṃ, pubbakam jinasevitaṃ.
174. “Tassa sammasato dhammaṃ, buddhabhūmiṃ asesato;
Tenāyaṃ kampitā pathavī, dasasahassī sadevake”.
175. Buddhassa vacanaṃ sutvā, mano nibbāyi tāvade;
Sabbe maṃ upasaṅkamma, punāpi abhivandisuṃ.
176. Samādiyitvā buddhaguṇaṃ, dalhaṃ katvāna mānasaṃ;
Dīpaṅkaraṃ namassitvā, āsanā vuṭṭhahiṃ tadā.
177. Dibbaṃ mānusakam pupphaṃ, devā mānusakā ubho;
Samokiranti pupphehi, vuṭṭhahantassa āsanā.
178. Vedayanti ca te sotthiṃ, devā mānusakā ubho;
“Mahantaṃ patthitaṃ tuyhaṃ, taṃ labhassu yathicchitaṃ.
179. “Sabbītiyo vivajjantu, soko rogo vinassatu;
Mā te bhavantvantarāyā [bhavatvantarāyo (sī. syā.)], phusa khippaṃ bodhimuttamaṃ.
180. “Yathāpi samaye patte, pupphanti pupphino dumā;
Tattheva tvaṃ mahāvīra, buddhaññaṇena pupphasi.
181. “Yathā ye keci sambuddhā, pūrayuṃ dasa pāramī;
Tattheva tvaṃ mahāvīra, pūraya dasa pāramī.
182. “Yathā ye keci sambuddhā, bodhimaṇḍamhi bujjhare;
Tattheva tvaṃ mahāvīra, bujjhassu jinabodhiyaṃ.
183. “Yathā ye keci sambuddhā, dhammacakkaṃ pavattayuṃ;
Tattheva tvaṃ mahāvīra, dhammacakkaṃ pavattaya.
184. “Puṇṇamāye yathā cando, parisuddho virocāti;
Tattheva tvaṃ puṇṇamano, viroca dasasahassiyaṃ.
185. “Rāhumutto yathā sūriyo, tāpena atirocāti;
Tattheva lokā muñcivā, viroca siriyaṃ tuvaṃ.
186. “Yathā yā kāci nadiyo, osaranti mahodadhiṃ;
Evaṃ sadevakā lokā, osarantu tavantike”.

187. Tehi thutappasattho so, dasa dhamme samādiya;
Te dhamme paripūrento, pavanaṃ pāvisī tadāti.

Sumedhapatthanākathā niṭṭhitā.

3. Dīpaṅkarabuddhavaṃso

1. Tadā te bhojayitvāna, sasaṅghaṃ lokanāyakaṃ;
Upagacchuṃ saraṇaṃ tassa, dīpaṅkarassa satthuno.
2. Saraṇāgamane kañci, nivesesi tathāgato;
Kañci pañcasu sīlesu, sīle dasavidhe paraṃ.
3. Kassaci deti sāmaññaṃ, caturo phalamuttame;
Kassaci asame dhamme, deti so paṭisambhidā.
4. Kassaci varasamāpattiyo, aṭṭha deti narāsabho;
Tisso kassaci vijjāyo, chaḷabhiññā pavecchati.
5. Tena yogena janakāyaṃ, ovasati mahāmuni;
Tena vitthārikaṃ āsi, lokanāthassa sāsanaṃ.
6. Mahāhanusabhakkhandho, dīpaṅkarassa nāmako;
Bahū jane tārayati, parimoceti duggatiṃ.
7. Bodhaneyyaṃ janaṃ disvā, satasahassepī yojane;
Khaṇena upagantvāna, bodheti taṃ mahāmuni.
8. Paṭhamābhisamaye buddho, koṭṭisatamabodhayi;
Dutiyaḥhisamaye nātho, navutikoṭṭimabodhayi.
9. Yadā ca devabhavanamhi, buddho dhammamadesayi;
Navutikoṭṭisahasānaṃ, tatiyaḥhisamayo ahu.
10. Sannipātā tayo āsuṃ, dīpaṅkarassa satthuno;
Koṭṭisatasahasānaṃ, paṭhamo āsi samāgamo.
11. Puna nāradakūṭamhi, pavivekagate jine;
Khīṇāsavā vītamaḷā, samimsu satakoṭṭiyo.
12. Yamhi kāle mahāvīro, sudassanasiluccaye;
Navakoṭṭisahashehi, pavāresi mahāmuni.
13. Dasavīsasahasānaṃ, dhammābhisamayo ahu;
Ekadvinnaṃ abhisamayā, gaṇanāto asaṅkhiyā.
14. Vitthārikaṃ bāhujaññaṃ, iddhaṃ phītaṃ ahū tadā;
Dīpaṅkarassa bhagavato, sāsanaṃ suvisodhitaṃ.
15. Cattāri satasahasāni, chaḷabhiññā mahiddhikā;
Dīpaṅkaraṃ lokaviduṃ, parivārenti sabbadā.

16. Ye keci tena samayena, jahanti mānusaṃ bhavaṃ;
Apattamānasā sekhā, garahitā bhavanti te.
17. Supupphitaṃ pāvacaṇaṃ, arahantehi tādihi;
Khīṇāsavehi vimalehi, upasobhati sabbadā.
18. Nagaraṃ rammavatī nāma, sudevo nāma khattiyo;
Sumedhā nāma janikā, dīpaṅkarassa satthuno.
19. Dasavassasahassāni, agāraṃ ajjha so vasi [ajjhāvasī jino (syā. ka.)];
Haṃsā koṇicā mayūrā ca, tayo pāsādamuttamā.
20. Tīṇisatasahassāni, nāriyo samalaṅkatā;
Padumā nāma sā nārī, usabhakkhandho atrajo.
21. Nimitte caturo disvā, hatthiyānena nikkhami;
Anūnadasamāsāni, padhāne padahī jino.
22. Padhānacāraṃ caritvāna, abujjhi mānasaṃ muni;
Brahmunā yācito santo, dīpaṅkaro mahāmuni.
23. Vatti cakkamaṃ mahāvīro, nandārāme sirīghare [sirīdhare (sī.)];
Nisino sirīsamūlamhi, akā titthiyamaddanaṃ.
24. Sumaṅgalo ca tisso ca, ahesuṃ aggasāvaka;
Sāgato [sobhito (ka.)] nāmupaṭṭhāko, dīpaṅkarassa satthuno.
25. Nandā ceva sunandā ca, ahesuṃ aggasāvika;
Bodhi tassa bhagavato, pipphalīti pavuccati.
26. Tapussabhallikā [tapassubhallikā (sī.)] nāma, ahesuṃ aggupaṭṭhakā;
Sirimā koṇā upaṭṭhikā, dīpaṅkarassa satthuno.
27. Asītihatthamubbedho, dīpaṅkaro mahāmuni;
Sobhati dīparukkhova, sālārājāva phullito.
28. Satasahassavassāni, āyu tassa mahesino;
Tāvātā tiṭṭhamāno so, tāresi janataṃ bahuṃ.
29. Jotayitvāna saddhammaṃ, santāretvā mahājanamaṃ;
Jalivā aggikkhandhova, nibbuto so sasāvako.
30. Sā ca iddhi so ca yaso, tāni ca pādesu cakkaratanāni;
Sabbamaṃ tamantarahitaṃ [samantarahitaṃ (sī. syā. ka.)], nanu rittā sabbasaṅkhārā
[sabbasaṅkhārāti (sabbattha)].
31. Dīpaṅkaro jino satthā, nandārāmamhi nibbuto;
Tatthevassa jinathūpo, chatṭiṃsubbedhayojanoti.

Dīpaṅkarassa bhagavato vaṃso paṭhama.

4. Koṇḍaññabuddhavamso

1. Dīpaṅkarassa aparena, koṇḍañño nāma nāyako;
Anantatejo amitayaso, appameyyo durāsado.
2. Dharaṇūpamo khamanena, sīlena sāgarūpamo;
Samādhinā merūpamo, ñāṇena gaganūpamo.
3. Indriyabalabojjhaṅga-maggasaccappakāsaṇaṃ;
Pakāsesi sadā buddho, hitāya sabbapāṇinaṃ.
4. Dhammacakkaṃ pavattente, koṇḍaññe lokanāyake;
Koṭisatasahassānaṃ, paṭhamābhisamayo ahu.
5. Tato parampi desente, naramarūnaṃ samāgame;
Navutikoṭisahasānaṃ, dutiyābhisamayo ahu.
6. Titthiye abhimaddanto, yadā dhammamedesayi;
Asītkoṭisahasānaṃ, tatiyābhisamayo ahu.
7. Sannipātā tayo āsuṃ, koṇḍaññassa mahesino;
Khīṇāsavānaṃ vimalānaṃ, santacittāna tādinaṃ.
8. Koṭisatasahasānaṃ, paṭhamo āsi samāgamo;
Dutiyo koṭisahasānaṃ, tatiyo navutikoṭinaṃ.
9. Ahaṃ tena samayena, vijitāvī nāma khattiyo;
Samuddaṃ antamantena, issariyaṃ vattayāmaṃ.
10. Koṭisatasahasānaṃ, vimalānaṃ mahesinaṃ;
Saha lokagganāthena, paramannena tappayim.
11. Sopi maṃ buddho byākāsi, koṇḍañño lokanāyako;
“Aparimeyyito kappe, buddho loke bhavissati.
12. “Padhānaṃ padahitvāna, katvā dukkarakārikaṃ;
Assatthamūle sambuddho, bujjhissati mahāyaso.
13. “Imassa janikā mātā, māyā nāma bhavissati;
Pitā suddhodano nāma, ayaṃ hessati gotamo.
14. “Kolito upatisso ca, aggā hessanti sāvakā;
Ānando nāmapaṭṭhāko, upaṭṭhissatimaṃ jinaṃ.
15. “Khemā uppalavaṇṇā ca, aggā hessanti sāvikā;
Bodhi tassa bhagavato, assatthoti pavucati.
16. “Citto ca hatthāḷavako, aggā hessantupaṭṭhakā;
Nandamātā ca uttarā, aggā hessantupaṭṭhikā;
Āyu vassasataṃ tassa, gotamassa yasassino”.

17. Idam sutvāna vacanam, asamassa mahesino;
Āmoditā naramarū, buddhabījam kira ayam.
18. Ukkuṭṭhisaddā vattanti, apphoṭenti hasanti ca;
Katañjalī namassanti, dasasahassidevatā.
19. “Yadimassa lokanāthassa, virajjhissāma sāsanaṃ;
Anāgatamhi addhāne, hessāma sammukhā imaṃ.
20. “Yathā manussā nadiṃ tarantā, paṭittham virajjhiya;
Heṭṭhātithe gahetvāna, uttaranti mahānadiṃ.
21. “Evameva mayaṃ sabbe, yadi muñcāmimaṃ jinaṃ;
Anāgatamhi addhāne, hessāma sammukhā imaṃ”.
22. Tassāhaṃ vacanaṃ sutvā, bhiyyo cittaṃ pasādayiṃ;
Tameva atthaṃ sādheṃto, mahārajjam jine adamaṃ;
Mahārajjam daditvāna [cajivā (sī.)], pabbajiṃ tassa santike.
23. Suttantaṃ vinayañcāpi, navaṅgaṃ satthusāsanaṃ;
Sabbam pariyaṇitvāna, sobhayiṃ jinasāsanaṃ.
24. Tathappamatto viharanto, nisajjaṭṭhānacaṅkame;
Abhiññāpāramiṃ gantvā, brahmalokamagañchahaṃ.
25. Nagaraṃ rammavatī nāma, sunando nāma khattiyo;
Sujātā nāma janikā, koṇḍaññaṃ mahesino.
26. Dasavassasahassāni, agāraṃ ajjha so vasi [agāramajjhe ca so vasi (syā.)];
Suci suruci subho ca, tayo pāsādamuttamā.
27. Tīṇisatasahassāni, nāriyo samalaṅkatā;
Rucidevī nāma nārī, vijitaseno atrajo.
28. Nimitte caturo disvā, rathayānena nikkhami;
Anūnadasamāsāni, padhānaṃ padahī jino.
29. Brahmunā yācito santo, koṇḍañño dvipaduttamo;
Vatti cakkamaṃ mahāvīro, devānaṃ nagaruttame.
30. Bhaddo ceva subhaddo ca, ahesuṃ aggasāvakā;
Anuruddho nāmupaṭṭhāko, koṇḍaññaṃ mahesino.
31. Tissā ca upatissā ca, ahesuṃ aggasāvikā;
Sālakalyāṇiko bodhi, koṇḍaññaṃ mahesino.
32. Soṇo ca upasoṇo ca, ahesuṃ aggupaṭṭhakā;
Nandā ceva sirīmā ca, ahesuṃ aggupaṭṭhikā.
33. So aṭṭhāsīti hatthāni, accuggato mahāmuni;
Sobhate uḷurājāva sūriyo majjhanhike yathā.

34. Vassasatasahassāni, āyu vijjati tāvade;
Tāvataṁ tiṭṭhamāno so, tāresi janataṁ bahuṁ.
35. Khīṇāsavehi vimalehi, vicittā āsi medanī;
Yathā gaganamuḷūhi, evaṁ so upasobhatha.
36. Tepi nāgā appameyyā, asaṅkhobhā durāsadā;
Vijjupātaṁva dassetvā, nibbutā te mahāyasā.
37. Sā ca atuliyā jinassa iddhi, ñāṇaparibhāvito ca samādhi;
Sabbhaṁ tamantarahaṁ, nanu rittā sabbasaṅkhārā.
38. Koṇḍañño pavaro buddho, candārāmaṁhi nibbuto;
Tattheva cetiyo citto, satta yojanamussitoti.

Koṇḍañṇassa bhagavato vaṁso dutiyo.

5. Maṅgalabuddhavaṁso

1. Koṇḍañṇassa aparena, maṅgalo nāma nāyako;
Tamaṁ loke nihantvāna, dhammokkamabhiddhārayi.
2. Atulāsi pabhā tassa, jinehaññehi uttariṁ;
Candasūriyapabhaṁ hantvā, dasasahassī virocati.
3. Sopi buddho pakāsesi, caturō saccavaruttame;
Te te saccarasam pītvā, vinodenti mahātamaṁ.
4. Patvāna bodhimatulaṁ, paṭhame dhammadesane;
Koṭṭisatasahassānaṁ, dhammābhisamayo ahu.
5. Surindadevabhavane, buddho dhammamadesayi;
Tadā koṭṭisahasānaṁ [\[navakoṭṭisahasānaṁ \(sī.\)\]](#), dutiyo samayo ahu.
6. Yadā sunando cakkavattī, sambuddhaṁ upasaṅkami;
Tadā āhani sambuddho, dhammabheriṁ varuttamaṁ.
7. Sunandassānucarā janatā, tadāsuṁ navutikoṭṭiyo;
Sabbepi te niravasesā, ahesuṁ ehi bhikkhukā.
8. Sannipātā tayo āsuṁ, maṅgalassa mahesino;
Koṭṭisatasahassānaṁ, paṭhama āsi samāgamo.
9. Duttiyo koṭṭisatasahassānaṁ, tatiyo navutikoṭṭinaṁ;
Khīṇāsavānaṁ vimalānaṁ, tadā āsi samāgamo.
10. Ahaṁ tena samayena, surucī nāma brāhmaṇo;
Ajjhāyako mantadharo, tiṇṇaṁ vedāna pārāgū.
11. Tamahaṁ upasaṅkamma, saraṇaṁ gantvāna satthuno;
Sambuddhappamukhaṁ saṅghaṁ, gandhamālena pūjayiṁ;

Pūjetvā gandhamālena, gavapānena tappayim.

12. Sopi maṃ buddho byākāsi, maṅgalo dvipaduttamo;
“Aparimeyyito kappe, ayaṃ buddho bhavissati.
13. “Padhānaṃ padahitvāna...pe... hessāma sammukhā imaṃ”.
14. Tassāpi vacanaṃ sutvā, bhiiyo cittaṃ pasādayim;
Uttariṃ vatamadhiṭṭhāsiṃ, dasa pāramipūriyā.
15. Tadā pīṭimanubrūhanto, sambodhivarapattiyā;
Buddhe datvāna maṃ gehaṃ, pabbajim tassa santike.
16. Suttantaṃ vinayañcāpi, navaṅgaṃ satthusāsaṇaṃ;
Sabbhaṃ pariyāpuṇitvā, sobhayim jinasāsaṇaṃ.
17. Tathappamatto viharanto, brahmaṃ bhāvetva bhāvanaṃ;
Abhiññāpāraṃ gantvā, brahmalokamagacchahaṃ.
18. Uttaraṃ nāma nagaraṃ, uttaro nāma khattiyō;
Uttarā nāma janikā, maṅgalassa mahesino.
19. Navavassasahassāni, agāraṃ ajjha so vasi;
Yasavā sucimā sirimā, tayo pāsādamuttamā.
20. Samatiṃsasahassāni, nāriyo samalaṅkatā;
Yasavatī nāma nārī, sīvalo nāma atrajo.
21. Nimitte caturo disvā, assayānena nikkhami;
Anūnaatṭhamāsāni, padhānaṃ padahī jino.
22. Brahmunā yācito santo, maṅgalo nāma nāyako;
Vatti cakkhaṃ mahāvīro, vane sirīvaruttame.
23. Sudevo dhammaseno ca, ahesuṃ aggasāvakā;
Pālito nāmupaṭṭhāko, maṅgalassa mahesino.
24. Sīvalā ca asokā ca, ahesuṃ aggasāvikā;
Bodhi tassa bhagavato, nāgarukkhoti vuccati.
25. Nando ceva visākho ca, ahesuṃ aggupaṭṭhakā;
Anulā ceva sutanā ca, ahesuṃ aggupaṭṭhikā.
26. Atṭhāsīti ratanāni, accuggato mahāmuni;
Tato niddhāvatī raṃsī, anekasatasahassiyo.
27. Navutivassasahassāni, āyu vijjati tāvade;
Tāvataṃ tiṭṭhamāno so, tāresi janataṃ bahuṃ.
28. Yathāpi sāgare ūmī, na sakkā tā gaṇetuye;
Tatheva sāvakā tassa, na sakkā te gaṇetuye.
29. Yāva atṭhāsī sambuddho, maṅgalo lokanāyako;

Na tassa sāsane atthi, sakilesamaraṇaṃ [[saṃkilesamaraṇaṃ \(sī.\)](#)] tadā.

30. Dhammokkaṃ dhārayitvāna, santāretvā mahājanaṃ;
Jalivā dhūmaketūva, nibbuto so mahāyaso.
31. Saṅkhārānaṃ sabhāvatthaṃ, dassayitvā sadevake;
Jalivā aggikkhandhova, sūriyo atthaṅgato yathā.
32. Uyyāne vassare nāma, buddho nibbāyi maṅgalo;
Tatthevassa jinathūpo, tiṃsayojanamuggatoti.

Maṅgalassa bhagavato vaṃso tatiyo.

6. Sumanabuddhavaṃso

1. Maṅgalassa aparena, sumano nāma nāyako;
Sabbadhammehi asamo, sabbasattānamuttamo.
2. Tadā amatabheriṃ so, āhanī mekhale pure;
Dhammasaṅkhasamāyuttaṃ, navaṅgaṃ jinasāsaṇaṃ.
3. Nijjinitvā kilese so, patvā sambodhimuttamaṃ;
Māpesi nagaraṃ satthā, saddhammapuravaruttamaṃ.
4. Nirantaraṃ akuṭilaṃ, ujum vipulavitthataṃ;
Māpesi so mahāvīthiṃ, satipaṭṭhānavaruttamaṃ.
5. Phale cattāri sāmāññe, catasso paṭisambhidā;
Chaḷabhiññāṭṭhasamāpattī, pasāresi tattha vīthiyaṃ.
6. Ye appamattā akhilā, hirivīriyehupāgatā;
Te te ime guṇavare, ādiyanti yathā sukhaṃ.
7. Evametena yogena, uddharanto mahājanaṃ;
Bodhesi paṭhamaṃ satthā, koṭisatasahassiyo.
8. Yamhi kāle mahāvīro, ovadī titthiye gaṇe;
Koṭisahasābhisamiṃsu [[koṭisatasahasāni \(syā. kaṃ.\)](#), [koṭisatasahasānaṃ \(ka.\)](#)], dutiye
dhammadesane.
9. Yadā devā manussā ca, samaggā ekamānasā;
Nirodhapañhaṃ pucchimiṃsu, saṃsayañcāpi mānaṃsaṃ.
10. Tadāpi dhammadesane, nirodhaparidīpane;
Navutikoṭisahasānaṃ, tatiyābhisamayo ahu.
11. Sannipātā tayo āsum, sumanassa mahesino;
Khīṇāsavānaṃ vimalānaṃ, santacittāna tādinaṃ.
12. Vassaṃvutthassa bhagavato, abhighuṭṭhe pavāraṇe;
Koṭisatasahasahi, pavāresi tathāgato.

13. Tatoparaṃ sannipāte, vimale kañcanapabbate;
Navutikoṭisahassānaṃ, dutiyo āsi samāgamo.
14. Yadā sakko devarājā, buddhadassanupāgami;
Asītikoṭisahassānaṃ, tatiyo āsi samāgamo.
15. Ahaṃ tena samayena, nāgarājā mahiddhiko;
Atulo nāma nāmena, ussannakusalasañcayo.
16. Tadāhaṃ nāgabhāvanā, nikkhamitvā sañātibhi;
Nāgānaṃ dibbaturiyehi, sasaṅghaṃ jinamupaṭṭhahim.
17. Koṭisatasahassānaṃ, annapānena tappayim;
Paccekadussayugaṃ datvā, saraṇaṃ tamupāgamim.
18. Sopi maṃ buddho byākāsi, sumano lokanāyako;
“Aparimeyyito kappe, ayaṃ buddho bhavissati.
19. “Padhānaṃ padahitvāna...pe... hessāma sammukhā imaṃ”.
20. Tassāpi vacanaṃ sutvā, bhiyyo cittaṃ pasādayim;
Uttarim vatamadhiṭṭhāsim, dasapāramipūriyā.
21. Nagaraṃ mekhalaṃ nāma [mekhalaṃ nāma nagaraṃ (sī. syā.)], sudatto nāma khattiyo;
Sirimā nāma janikā, sumanassa mahesino.
22. Navavassasahassāni, agāraṃ ajjha so vasi;
Cando sucando vaṭaṃso ca, tayo pāsādamuttamā.
23. Tesatṭhisatasahassāni, nāriyo samalaṅkatā;
Vaṭaṃsikā nāma nārī, anūpamo nāma atrajo.
24. Nimitte caturo disvā, hatthiyānena nikkhami;
Anūnadasamāsāni, padhānaṃ padahī jino.
25. Brahmunā yācito santo, sumano lokanāyako;
Vatti cakkamaṃ mahāvīro, mekhale puramuttame.
26. Saraṇo bhāvitatto ca, ahesuṃ aggasāvakā;
Udeno nāmupaṭṭhāko, sumanassa mahesino.
27. Soṇā ca upasoṇā ca, ahesuṃ aggasāvikā;
Sopi buddho amitayaso, nāgamūle abujjhatha.
28. Varuṇo ceva saraṇo ca, ahesuṃ aggupaṭṭhakā;
Cālā ca upacālā ca, ahesuṃ aggupaṭṭhikā.
29. Uccattanena [uccatarena (ka.)] so buddho, navutihatthamuggato;
Kañcanagghiyasaṅkāso, dasasahassī virocati.
30. Navutivassasahassāni, āyu vijjati tāvade;
Tāvataṃ tiṭṭhamāno so, tāresi janataṃ bahum.

31. Tāraṇīye tārayitvā, bodhanīye ca bodhayi;
Parinibbāyi sambuddho, uḷurājāva atthami.
32. Te ca khīṇāsavā bhikkhū, so ca buddho asādiso;
Atulappabhaṃ dassayitvā, nibbutā ye mahāyasā.
33. Tañca ñāṇaṃ atuliyam, tāni ca atulāni ratanāni;
Sabbam tamantarahaṃ, nanu rittā sabbasaṅkhārā.
34. Sumano yasadharo buddho, aṅgārāmaṃhi nibbuto;
Tattheva tassa jinathūpo, catuyojanamuggatoti.

Sumanassa bhagavato vaṃso catuttho.

7. Revatabuddhavaṃso

1. Sumanassa aparena, revato nāma nāyako;
Anūpamo asadiso, atulo uttamo jino.
2. Sopi dhammaṃ pakāsesi, brahmunā abhiyācito;
Khandhadhātuvavatthānaṃ, appavattaṃ bhavābhava.
3. Tassābhisamayā tīṇi, ahesuṃ dhammadesane;
Gaṇanāya na vattabbo, paṭhamābhisamayo ahu.
4. Yadā arindamaṃ rājaṃ [rājānaṃ (ka.)], vinesi revato muni;
Tadā koṭisahasānaṃ, dutiyābhisamayo ahu.
5. Sattāhaṃ paṭisallānā, vuṭṭhahitvā narāsabho;
Koṭisataṃ naramarūnaṃ, vinesi uttame phale.
6. Sannipātā tayo āsuṃ, revatassa mahesino;
Khīṇāsavānaṃ vimalānaṃ, suvimuttāna tādinaṃ.
7. Atikkantā gaṇanapathaṃ, paṭhamaṃ ye samāgatā;
Koṭisatasahasānaṃ, dutiyo āsi samāgamo.
8. Yopi [yo so (syā. kaṃ. ka.)] paññāya asamo, tassa cakkānuvattako;
So tadā byādhitto āsi, patto jīvitasamayaṃ.
9. Tassa gilānapucchāya, ye tadā upagatā munī;
Koṭisahasā arahanto, tatiyo āsi samāgamo.
10. Ahaṃ tena samayena, atidevo nāma brāhmaṇo;
Upagantvā revataṃ buddhaṃ, saraṇaṃ tassa gañchahaṃ.
11. Tassa sīlaṃ samādhiñca, paññāguṇamanuttamaṃ;
Thomayitvā yathāthāmaṃ, uttarīyamadāsahaṃ.
12. Sopi maṃ buddho byākāsi, revato lokanāyako;
“Aparimeyyito kappe, ayaṃ buddho bhavissati.

13. “Padhānaṃ padahitvāna...pe... hessāma sammukhā imaṃ”.
14. Tassāpi vacanaṃ sutvā, bhiyyo cittaṃ pasādayiṃ;
Uttariṃ vatamadhiṭṭhāsiṃ, dasapāramipūriyā.
15. Tadāpi taṃ buddhadhammaṃ, saritvā anubrūhayiṃ;
Āharissāmi taṃ dhammaṃ, yaṃ mayhaṃ abhipatthitaṃ.
16. Nagaraṃ sudhaññavatī nāma [sudhammakam nāma (sī.), sudhaññakam nāma (syā.)], vipulo
nāma khattiyo;
Vipulā nāma janikā, revatassa mahesino.
17. Cha ca vassasahassāni [chabbassasahassāni (sī. syā.)], agāraṃ ajjha so vasi;
Sudassano ratanagghi, āveḷo ca vibhūsito;
Puññakammābhiniḃattā, tayo pāsādamuttamā.
18. Tettiṃsa ca sahasāni, nāriyo samalaṅkatā;
Sudassanā nāma nārī, varuṇo nāma atrajo.
19. Nimitte caturo disvā, rathayānena nikkhami;
Anūnasattamāsāni, padhānaṃ padahī jino.
20. Brahmunā yācito santo, revato lokanāyako;
Vatti cakkam mahāvīro, varuṇārāme sirīghare.
21. Varuṇo brahmadevo ca, ahesuṃ aggasāvakā;
Sambhavo nāmupaṭṭhāko, revatassa mahesino.
22. Bhaddā ceva subhaddā ca, ahesuṃ aggasāvikā;
Sopi buddho asamasamo, nāgamūle abujjhatha.
23. Padumo kuñjaro ceva, ahesuṃ aggupaṭṭhikā;
Sirīmā ceva yasavatī, ahesuṃ aggupaṭṭhikā.
24. Uccattanena so buddho, asītihatthamuggato;
Obhāseti disā sabbā, indaketuva uggato.
25. Tassa sarīre nibbattā, pabhāmālā anuttarā;
Divā vā yadi vā rattiṃ, samantā pharati yojanaṃ.
26. Saṭṭhivassasahassāni, āyu vijjati tāvade;
Tāvataṃ tiṭṭhamāno so, tāresi janataṃ bahuṃ.
27. Dassayitvā buddhabalaṃ, amataṃ loke pakāsayaṃ;
Nibbāyi anupādāno, yathaggupādānasāṅkhayā.
28. So ca kāyo ratananibho, so ca dhammo asādiso;
Sabbam tamantaraḃitaṃ, nanu rittā sabbasaṅkhārā.
29. Revato yasadharo buddho, nibbuto so mahāpure;
Dhātuvitthārikaṃ āsi, tesu tesu padesatoti.

Revatassa bhagavato vaṃso pañcama.

8. Sobhitabuddhavamsō

1. Revatassa aparena, sobhito nāma nāyako;
Samāhito santacitto, asamo appaṭipuggalo.
2. So jino sakagehamhi, mānasaṃ vinivattayi;
Patvāna kevalaṃ bodhiṃ, dhammacakkaṃ pavattayi.
3. Yāva heṭṭhā avīcīto, bhavaggā cāpi uddhato;
Etthantare ekaparisā, ahosi dhammadesane.
4. Tāya parisāya sambuddho, dhammacakkaṃ pavattayi;
Gaṇanāya na vattabbo, paṭhamābhisamayo ahu.
5. Tato parampi desente, marūnañca samāgame;
Navutikoṭisahassānaṃ, dutiyābhisamayo ahu.
6. Punāparaṃ rājaputto, jayaseno nāma khattiyo;
Ārāmaṃ ropayitvāna, buddhe niyyādayī tadā.
7. Tassa yāgaṃ pakittento, dhammaṃ desesi cakkhumā;
Tadā koṭisahassānaṃ, tatiyābhisamayo ahu.
8. Sannipātā tayo āsuṃ, sobhitassa mahesino;
Khīṇāsavānaṃ vimalānaṃ, santacittāna tāḍinaṃ.
9. Uggato nāma so rājā, dānaṃ deti naruttame;
Tamhi dāne samāgañchuṃ, arahantā [arahataṃ (ka.)] satakoṭiyo.
10. Punāparaṃ puragaṇo [pugagaṇo (ka.)], deti dānaṃ naruttame;
Tadā navutikoṭīnaṃ, dutiyo āsi samāgamo.
11. Devaloke vasitvāna, yadā orohatī jino;
Tadā asītikoṭīnaṃ, tatiyo āsi samāgamo.
12. Ahaṃ tena samayena, sujāto nāma brāhmaṇo;
Tadā sasāvakaṃ buddhaṃ, annapānena tappayim.
13. Sopi maṃ buddho byākāsi, sobhito lokanāyako;
“Aparimeyyito kappe, ayaṃ buddho bhavissati.
14. “Padhānaṃ padahitvāna...pe... hessāma sammukhā imaṃ”.
15. Tassāpi vacanaṃ sutvā, haṭṭho saṃviggamānaso;
Tamevatthamanuppattiyā, uggamaṃ dhitimakāsahaṃ.
16. Sudhammaṃ nāma nagaraṃ, sudhammo nāma khattiyo;
Sudhammā nāma janikā, sobhitassa mahesino.
17. Navavassasahassāni, agāraṃ ajjha so vasi;
Kumudo nāḷino padumo, tayo pāsādamuttamā.

18. Sattatiṃsasahasāni, nāriyo samalaṅkatā;
Maṇilā [makhilā (aṭṭha.), samaṅgī (sī.), makilā (syā. kaṃ.)] nāma sā nārī, sīho nāmāsi atrajo.
19. Nimitte caturo disvā, pāsādenābhikkhami;
Sattāhaṃ padhānacāraṃ, caritvā purisuttamo.
20. Brahmunā yācito santo, sobhito lokanāyako;
Vatti cakkhaṃ mahāvīro, sudhammuyyānamuttame.
21. Asamo ca sunetto ca, ahesuṃ aggasāvakā;
Anomo nāmupaṭṭhāko, sobhitassa mahesino.
22. Nakulā ca sujātā ca, ahesuṃ aggasāvikā;
Bujjhamāno ca so buddho, nāgamūle abujjhatha.
23. Rammo ceva sudatto ca, ahesuṃ aggupaṭṭhakā;
Nakulā ceva cittā ca, ahesuṃ aggupaṭṭhikā.
24. Aṭṭhapaṇṇāsaratanaṃ, accuggato mahāmuni;
Obhāseti disā sabbā, sataraṃsīva uggato.
25. Yathā suphullaṃ pavanaṃ, nānāgandhehi dhūpitaṃ;
Tatheva tassa pāvacaṇaṃ, sīlagandhehi dhūpitaṃ.
26. Yathāpi sāgaro nāma, dassanena atappiyo;
Tatheva tassa pāvacaṇaṃ, savaṇena atappiyaṃ.
27. Navutivassasahasāni, āyu vijjati tāvade;
Tāvātā tiṭṭhamāno so, tāresi janataṃ bahuṃ.
28. Ovādaṃ anusitṭhiṅca, datvāna sesake jane;
Hutāsanova tāpetvā, nibbuto so sasāvako.
29. So ca buddho asamasamo, tepi sāvakā balappattā;
Sabbhaṃ tamantaraḥitaṃ, nanu rittā sabbasaṅkhārā.
30. Sobhito varasambuddho, sīhārāmamhi nibbuto;
Dhātuvitthārikaṃ āsi, tesu tesu padesatoti.

Sobhitassa bhagavato vaṃso chaṭṭho.

9. Anomadassībuddhavaṃso

1. Sobhitassa aparena, sambuddho dvipaduttamo;
Anomadassī amitayaso, tejassī duratikkamo.
2. So chetvā bandhanaṃ sabbaṃ, viddhaṃsetvā tayo bhava;
Anivattigamaṇaṃ maggaṃ, desesi devamānuse.
3. Sāgarova asaṅkhobho, pabbatova durāsado;
Ākāsova ananto so, sālārājāva phullito.

4. Dassanenapi taṃ buddhaṃ, tositā honti pāṇino;
Byāharantaṃ giramaṃ sutvā, amataṃ pāpuṇanti te.
5. Dhammābhisamayo tassa, iddho phīto tadā ahu;
Koṭṭisatāni abhisamiṃsu, paṭhame dhammadesane.
6. Tato paraṃ abhisamaye, vassante dhammavuṭṭhiyo;
Asītkoṭṭiyobhisamiṃsu, dutiye dhammadesane.
7. Tatoparañhi vassante, tappayante ca pāṇinaṃ;
Aṭṭhasattatikoṭṭinaṃ, tatiyābhisamayo ahu.
8. Sannipātā tayo āsuma, tassāpi ca mahesino;
Abhiññābalappattānaṃ, pupphitānaṃ vimuttiyā.
9. Aṭṭhasatasahassānaṃ, sannipāto tadā ahu;
Pahīnamadamohānaṃ, santacittāna tādinaṃ.
10. Sattasatasahassānaṃ, dutiyo āsi samāgamo;
Anaṅgaṇānaṃ virajānaṃ, upasantāna tādinaṃ.
11. Channaṃ satasahassānaṃ, tatiyo āsi samāgamo;
Abhiññābalappattānaṃ, nibbutānaṃ tapassinaṃ.
12. Ahaṃ tena samayena, yakkho āsiṃ mahiddhiko;
Nekānaṃ yakkhakoṭṭinaṃ, vasavattimhi issaro.
13. Tadāpi taṃ buddhavaraṃ, upagantvā mahesinaṃ;
Annapānena tappesiṃ, sasaṅghaṃ lokanāyakaṃ.
14. Sopi maṃ tadā byākāsi, visuddhanayano muni;
“Aparimeyyito kappe, ayaṃ buddho bhavissati.
15. “Padhānaṃ padahitvāna...pe... hessāma sammukhā imaṃ”.
16. Tassāpi vacanaṃ sutvā, haṭṭho saṃviggamānaso;
Uttariṃ vatamadhiṭṭhāsiṃ, dasapāramipūriyā.
17. Nagaraṃ candavatī nāma, yasavā nāma khattiyo;
Mātā yasodharā nāma, anomadassissa satthuno.
18. Dasavassasahassāni, agāraṃ ajjha so vasi;
Sirī upasirī vaḍḍho, tayo pāsādamuttamā.
19. Tevīsatisahassāni, nāriyo samalaṅkatā;
Sirimā nāma sā nārī, upavāṇo nāma atrajo.
20. Nimitte caturo disvā, sivikāyābhinikkhami;
Anūnadasamāsāni, padhānaṃ padahī jino.
21. Brahmunā yācito santo, anomadassī mahāmuni;
Vatti cakkamaṃ mahāvīro, uyyāne so sudassane [[sudassanuyyānamuttame \(syā. kaṃ.\)](#)].

22. Nisabho ca anomo ca [asoko ca (sī.)], ahesuṃ aggasāvakā;
Varuṇo nāmuṇḍaṅḍhāko, anomadassissa satthuno.
23. Sundarī ca sumanā ca, ahesuṃ aggasāvikā;
Bodhi tassa bhagavato, ajjunoti pavuccati.
24. Nandivaḍḍho sirivaḍḍho, ahesuṃ aggupaṭṭhakā;
Uppalā ceva padumā ca, ahesuṃ aggupaṭṭhikā.
25. Aṭṭhapaṇṇāsaratanaṃ, accuggato mahāmuni;
Pabhā niddhāvātī tassa, sataraṃsīva uggato.
26. Vassasatasahassāni, āyu vijjati tāvade;
Tāvātā tiṭṭhamāno so, tāresi janataṃ bahuṃ.
27. Supupphitaṃ pāvacaṇaṃ, arahantehi tādihi;
Vītarāgehi vimalehi, sobhittha jinasāsaṇaṃ.
28. So ca satthā amitayaso, yugāni tāni atuliyāni;
Sabbāṃ tamantaraḥitaṃ, nanu rittā sabbasaṅkhārā.
29. Anomadassī jino satthā, dhammārāmaṃhi nibbuto;
Tatthevassa jīnathūpo, ubbedho pañcavīsātīti.

Anomadassissa bhagavato vaṃso sattamo.

10. Padumabuddhavaṃso

1. Anomadassissa aparena, sambuddho dvipaduttamo;
Padumo nāma nāmena, asamo appaṭipuggalo.
2. Tassāpi asamaṃ sīlaṃ, samādhipi anantako;
Asaṅkheyyaṃ ñāṇavaraṃ, vimuttiṃ anūpamā.
3. Tassāpi atulatejassa, dhammacakkappavattane;
Abhisamayā tayo āsuṃ, mahātamaṃ pavāhanā.
4. Paṭhamābhisamaye buddho, koṭisatama bodhayi;
Dutiyaṃ abhisamaye dhīro, navutikoṭimabodhayi.
5. Yadā ca padumo buddho, ovaḍī sakamatrajaṃ;
Tadā asītikoṭīnaṃ, tatiyaṃ abhisamayo ahu.
6. Sannipātā tayo āsuṃ, padumassa mahesino;
Koṭisatasahassānaṃ, paṭhamo āsī samāgamo.
7. Kathinatthārasamaye, uppanne kathinacīvare;
Dhammasenāpatitthāya, bhikkhū sibbiṃsu [yācīṃsu (ka.)] cīvaram.
8. Tadā te vimalā bhikkhū, chaḷabhiññā mahiddhikā;
Tīṇi satasahassāni, samīṃsu aparājītā.

9. Punāparaṃ so narāsabho [naravusabho (syā. kaṃ.)], pavane vāsaṃ upāgami;
Tadā samāgamo āsi, dvinnaṃ sataśahassinaṃ.
10. Ahaṃ tena samayena, sīho āsiṃ migādhibhū;
Vivekamanubrūhantaṃ, pavane addasaṃ jinaṃ.
11. Vanditvā sirasā pāde, katvāna taṃ padakkhiṇaṃ;
Tikkhattuṃ abhināditvā, sattāhaṃ jīnamupaṭṭhahaṃ.
12. Sattāhaṃ varasamāpattiyā, vuṭṭhahitvā tathāgato;
Manasā cintayitvāna, koṭibhikkhū samānayaṃ.
13. Tadāpi so mahāvīro, tesam majjhe viyākari;
“Aparimeyyito kappe, ayaṃ buddho bhavissati.
14. “Padhānaṃ padahitvāna...pe... hessāma sammukhā imaṃ”.
15. Tassāpi vacanaṃ sutvā, bhiyyo cittaṃ pasādayiṃ;
Uttariṃ vatamadhiṭṭhāsiṃ, dasapāramipūriyā.
16. Campakaṃ nāma nagaraṃ, asama nāma khattiyo;
Asamā nāma janikā, padumassa mahesino.
17. Dasavassasahassāni, agāraṃ ajjha so vasi;
Nandāvasuyasuttarā, tayo pāsādamuttamā.
18. Tettiṃsa ca sahasāni, nāriyo samalaṅkatā;
Uttarā nāma sā nārī, rammo nāmāsi atrajo.
19. Nimitte caturo disvā, rathayānena nikkhami;
Anūnaaṭṭhamāsāni, padhānaṃ padahī jino.
20. Brahmunā yācito santo, padumo lokanāyako;
Vatti cakkam mahāvīro, dhanañcuyyānamuttame.
21. Sālo ca upasālo ca, ahesuṃ aggasāvakā;
Varuṇo nāmupaṭṭhāko, padumassa mahesino.
22. Rādhā ceva surādhā ca, ahesuṃ aggasāvikā;
Bodhi tassa bhagavato, mahāsoṇoti vuccati.
23. Bhiyyo ceva asama ca, ahesuṃ aggupaṭṭhakā;
Rucī ca nandarāmā ca, ahesuṃ aggupaṭṭhikā.
24. Aṭṭhapaṇṇāsaratanaṃ, accuggato mahāmuni;
Pabhā niddhāvātī tassa, asamā sabbaso disā.
25. Candappabhā sūriyappabhā, ratanaggimaṇippabhā;
Sabbāpi tā hatā honti, patvā jīnapabhuttamaṃ.
26. Vassasatasahassāni, āyu vijjati tāvade;
Tāvātā tiṭṭhamāno so, tāresi janataṃ bahuṃ.

27. Paripakkamānase satte, bodhayitvā asesato;
Sesake anusāsivā, nibbuto so sasāvako.
28. Uragova tacam jīṇṇam, vaddhapattaṃva pādapo;
Jahitvā sabbasaṅkhāre, nibbuto so yathā sikhī.
29. Padumo jinavaro satthā, dhammārāmamhi nibbuto;
Dhātuvitthārikaṃ āsi, tesu tesu padesatoti.

Padumassa bhagavato vaṃso aṭṭhamo.

11. Nāradabuddhavaṃso

1. Padumassa aparena, sambuddho dvipaduttamo;
Nārado nāma nāmena, asamo appaṭipuggalo.
2. So buddho cakkavattissa, jeṭṭho dayitaorasō;
Āmukkamālābharaṇo, uyyānaṃ upasaṅkami.
3. Tatthāsi rukkho yasavipulo, abhirūpo brahā suci;
Tamajjhapatvā upanisīdi, mahāsoṇassa heṭṭhato.
4. Tattha ñāṇavaruppajji, anantaṃ vajirūpamaṃ;
Tena vicini saṅkhāre, ukkujjamavakujjakaṃ [kujjataṃ (syā. kaṃ.)].
5. Tattha sabbakilesāni, asesamabhivāhayi;
Pāpuṇī kevalaṃ bodhiṃ, buddhañāṇe ca cuddasa.
6. Pāpuṇitvāna sambodhiṃ, dhammacakkaṃ pavattayi;
Koṭisatasahassānaṃ, paṭhamābhisamayo ahu.
7. Mahādoṇaṃ nāgarājaṃ, vinayanto mahāmuni;
Pāṭiheraṃ tadākāsi, dassayanto sadevake.
8. Tadā devamanussānaṃ, tamhi dhammappakāsane;
Navutikoṭisahasāni, tariṃsu sabbasaṃsayamaṃ.
9. Yamhi kāle mahāvīro, ovadī sakamatrajaṃ;
Asītkoṭisahasānaṃ, tatiyābhisamayo ahu.
10. Sannipātā tayo āsuṃ, nāradassa mahesino;
Koṭisatasahasānaṃ, paṭhamo āsi samāgamo.
11. Yadā buddho buddhaguṇaṃ, sanidānaṃ pakāsayi;
Navutikoṭisahasāni, samiṃsu vimalā tadā.
12. Yadā verocano nāgo, dānaṃ dadāti satthuno;
Tadā samiṃsu jinaputtā, asītisatasahassīyo.
13. Ahaṃ tena samayena, jaṭilo uggaṭāpano;
Antalikkhacaro āsiṃ, pañcābhiññāsu pāragū.

14. Tadāpāhaṃ asamasamaṃ, sasaṅghaṃ saparijjanam;
Annapanena tappetvā, candanenābhipūjayiṃ.
15. Sopi maṃ tadā byākāsi, nārado lokanāyako;
“Aparimeyyito kappe, ayaṃ buddho bhavissati.
16. “Padhānaṃ padahitvāna...pe... hessāma sammukhā imaṃ”.
17. Tassāpi vacanaṃ sutvā, bhiiyo hāsetva mānasam;
Adhiṭṭhahiṃ vataṃ uggaṃ, dasapāramipūriyā.
18. Nagaraṃ dhañṇavatī nāma, sudevo nāma khattiyo;
Anomā nāma janikā, nāradassa mahesino.
19. Navavassasahassāni, agāraṃ ajjha so vasi;
Jito vijitābhirāmo, tayo pāsādamuttamā.
20. Ticattārīsasahassāni, nāriyo samalaṅkatā;
Vijitasenā nāma nārī, nanduttaro nāma atrajo.
21. Nimitte caturo disvā, padasā gamanena nikkhami;
Sattāhaṃ padhānacāraṃ, acarī purisuttamo [lokanāyako (sī. ka.)].
22. Brahmunā yācito santo, nārado lokanāyako;
Vatti cakkam mahāvīro, dhanañcuyyānamuttame.
23. Bhaddasālo jitamitto, ahesuṃ aggasāvakā;
Vāseṭṭho nāmupaṭṭhāko, nāradassa mahesino.
24. Uttarā phaggunī ceva, ahesuṃ aggasāvikā;
Bodhi tassa bhagavato, mahāsoṇoti vuccati.
25. Uggarindo vasabho ca, ahesuṃ aggupaṭṭhakā;
Indāvarī ca vaṇḍī [undī (sī.), gaṇḍī (syā. kaṃ.)] ca, ahesuṃ aggupaṭṭhikā.
26. Aṭṭhāsītiratanāni, accuggato mahāmuni;
Kañcanagghiyasaṅkāso, dasasahassī virocati.
27. Tassa byāmapabhā kāyā, niddhāvati disodisaṃ;
Nirantaraṃ divārattiṃ, yojanaṃ pharate sadā.
28. Na keci tena samayena, samantā yojane janā;
Ukkāpadīpe ujjālenṭi, buddharamsīhi otthaṭā.
29. Navativassasahassāni, āyu vijjati tāvade;
Tāvataṃ tiṭṭhamāno so, tāresi janataṃ bahuṃ.
30. Yathā uḷūhi gaganam, vicittaṃ upasobhati;
Tatheva sāsanam tassa, arahantehi sobhati.
31. Saṃsārasotaṃ taraṇāya, sesake paṭipannake;
Dhammasetaṃ daḷhaṃ katvā, nibbuto so narāsabho.

32. Sopi buddho asamasamo, tepi khīṇāsavā atulatejā;
Sabbam tamantarahitaṃ, nanu rittā sabbasaṅkhārā.
33. Nārado jinavasabho, nibbuto sudassane pure;
Tatthevassa thūpavaro, catuyojanamuggatoti.

Nāradassa bhagavato vaṃso navamo.

12. Padumuttarabuddhavaṃso

1. Nāradassa aparena, sambuddho dvipaduttamo;
Padumuttaro nāma jino, akkhobho sāgarūpamo.
2. Maṇḍakappova so āsi, yamhi buddho ajāyatha;
Ussannakusalā janatā, tamhi kappe ajāyatha.
3. Padumuttarassa bhagavato, paṭhame dhammadesane;
Koṭisatasahassānaṃ, dhammābhisamayo ahu.
4. Tato parampi vassante, tappayante ca pāṇine;
Sattatiṃsasatasahassānaṃ, dutiyābhisamayo ahu.
5. Yamhi kāle mahāvīro, ānandaṃ upasaṅkami;
Pitusantikaṃ upagantvā, āhanī amatadundubhiṃ.
6. Āhate amatabherimhi, vassante dhammavuṭṭhiyā;
Paññāsasatasahassānaṃ, tatiyābhisamayo ahu.
7. Ovādako viññāpako, tārako sabbapāṇinaṃ;
Desanākusalo buddho, tāresi janataṃ bahuṃ.
8. Sannipātā tayo āsuṃ, padumuttarassa satthuno;
Koṭisatasahassānaṃ, paṭhamo āsi samāgamo.
9. Yadā buddho asamasamo, vasi vebhārapabbate;
Navutikoṭisahasassānaṃ, dutiyo āsi samāgamo.
10. Puna cārikaṃ pakkante, gāmanigamaraṭṭhato;
Asītikoṭisahasassānaṃ, tatiyo āsi samāgamo.
11. Ahaṃ tena samayena, jaṭilo nāma raṭṭhiko;
Sambuddhappamukhaṃ saṅghaṃ, sabhattaṃ dussamadāsahaṃ.
12. Sopi maṃ buddho byākāsi, saṅghamajjhe nisīdiya;
“Satasahassito kappe, ayaṃ buddho bhavissati.
13. “Padhānaṃ padahitvāna...pe... hessāma sammukhā imaṃ”.
14. Tassāpi vacanaṃ sutvā, uttariṃ vatamadhiṭṭhahim;
Akāsiṃ uggadaḷhaṃ dhitim, dasapāramipūriyā.
15. Byāhatā titthiyā sabbe, vimaṇā dummanā tadā;

Na tesam keci paricaranti, raṭṭhato nicchubhanti te.

16. Sabbe tattha samāgantvā, upagacchuṃ buddhasantike;
Tuvaṃ nātho mahāvīra, saraṇaṃ hohi cakkhuma.
17. Anukampako kāruṇiko, hitesī sabbapāṇinaṃ;
Sampatte titthiye sabbe, pañcasīle patiṭṭhapi.
18. Evaṃ nirākulaṃ āsi, suññataṃ titthiyehi taṃ;
Vicittaṃ arahantehi, vasībhūtehi tādihi.
19. Nagaraṃ haṃsavatī nāma, ānando nāma khattiyo;
Sujātā nāma janikā, padumuttarassa satthuno.
20. Dasavassasahassāni, agāraṃ ajjha so vasi;
Naravāhano yaso vasavattī [nārivāhano yasavatī (syā. kaṃ.)], tayo pāsādamuttamā.
21. Ticattārīsasahassāni, nāriyo samalaṅkatā;
Vasudattā nāma nārī, uttamo nāma atrajo.
22. Nimitte caturo disvā, pāsādenābhinikkhami;
Sattāhaṃ padhānacāraṃ, acarī purisuttamo.
23. Brahmunā yācito santo, padumuttaro vināyako;
Vatti cakkhaṃ mahāvīro, mithiluyyānamuttame.
24. Devalo ca sujāto ca, ahesuṃ aggasāvakā;
Sumano nāmupaṭṭhāko, padumuttarassa mahesino.
25. Amitā ca asamā ca, ahesuṃ aggasāvikā;
Bodhi tassa bhagavato, salaloti pavuccati.
26. Vitiṇṇo ceva [amito ceva (syā.)] tisso ca, ahesuṃ aggupaṭṭhakā;
Haṭṭhā ceva vicittā ca, ahesuṃ aggupaṭṭhikā.
27. Aṭṭhapaṇṇāsaratanaṃ, accuggato mahāmuni;
Kañcanagghiyasaṅkāso, dvattiṃsavaralakkhaṇo.
28. Kuṭṭhā kavāṭā bhittī ca, rukkhā nagasiluccayā;
Na tassāvarenaṃ atthi, samantā dvādasayojane.
29. Vassasatasahassāni, āyu vijjati tāvade;
Tāvataṃ tiṭṭhamāno so, tāresi janataṃ bahuṃ.
30. Santāretvā bahujanaṃ, chinditvā sabbasaṃsayam;
Jalivā aggikkhandhova nibbuto so sasāvako.
31. Padumuttaro jino buddho, nandārāmamhi nibbuto;
Tatthevassa thūpavaro, dvādasubbedhayojanoti.

Padumuttarassa bhagavato vaṃso dasamo.

13. Sumedhabuddhavamso

1. Padumuttarassa aparena, sumedho nāma nāyako;
Durāsado uggatejo, sabbalokuttamo muni.
2. Pasannanetto sumukho, brahā uju patāpavā;
Hitesī sabbasattānaṃ, bahū mocesi bandhanā.
3. Yadā buddho pāpuṇitvā, kevalaṃ bodhimuttamaṃ;
Sudassanamhi nagare, dhammacakkaṃ pavattayī.
4. Tassāpi abhisamayā tīṇi, ahesuṃ dhammadesane;
Koṭisatasahassānaṃ, paṭhamābhisamayo ahu.
5. Punāparaṃ kumbhakaṇṇaṃ, yakkhaṃ so damayī jino;
Navutikoṭisahassānaṃ, dutiyābhisamayo ahu.
6. Punāparaṃ amitayaso, catusaccaṃ pakāsayi;
Asītkoṭisahassānaṃ, tatiyābhisamayo ahu.
7. Sannipātā tayo āsuṃ, sumedhassa mahesino;
Khīṇāsavānaṃ vimalānaṃ, santacittāna tādinaṃ.
8. Sudassanaṃ nāma nagaraṃ, upagañchi jino yadā;
Tadā khīṇāsavā bhikkhū, samimsu satakoṭiyo.
9. Punāparaṃ devakūṭe, bhikkhūnaṃ kathinatthate;
Tadā navutikoṭīnaṃ, dutiyo āsi samāgamo.
10. Punāparaṃ dasabalo, yadā carati cārikaṃ;
Tadā asītkoṭīnaṃ, tatiyo āsi samāgamo.
11. Ahaṃ tena samayena, uttaro nāma māṇavo;
Asītkoṭiyo mayhaṃ, ghare sannicitaṃ dhanam.
12. Kevalaṃ sabbaṃ datvāna, sasaṅghe lokanāyake;
Saraṇaṃ tassupagañchiṃ, pabbajjañcābhīrocayiṃ.
13. Sopi maṃ buddho byākāsi, karonto anumodanaṃ;
“Timsakappasahassamhi, ayaṃ buddho bhavissati.
14. “Padhānaṃ padahitvāna...pe... hessāma sammukhā imaṃ”.
15. Tassāpi vacanaṃ sutvā, bhīyyo cittaṃ pasādayiṃ;
Uttariṃ vatamadhiṭṭhāsiṃ, dasapāramipūriyā.
16. Suttantaṃ vinayañcāpi, navaṅgaṃ satthusāsaṇaṃ;
Sabbaṃ pariyāpuṇitvāna, sobhayaṃ jinasāsaṇaṃ.
17. Tathappamatto viharanto, nisajjaṭṭhānacaṅkame;
Abhiññāsu pāramiṃ gantvā, brahmalokamagañchahaṃ.

18. Sudassanaṃ nāma nagaraṃ, sudatto nāma khattiyo;
Sudattā nāma janikā, sumedhassa mahesino.
19. Navavassasahassāni, agāraṃ ajjha so vasi;
Sucandakañcanasirivaḍḍhā, tayo pāsādamuttamā.
20. Tisoḷasasahassāni, nāriyo samalaṅkatā;
Sumanā nāma sā nārī, punabbasu nāma atrajo.
21. Nimitte caturo disvā, hatthiyānena nikkhami;
Anūnakaṃ aḍḍhamāsaṃ, padhānaṃ padahī jīno.
22. Brahmunā yācito santo, sumedho lokanāyako;
Vatti cakkamaṃ mahāvīro, sudassanuyyānamuttame.
23. Saraṇo sabbakāmo ca, ahesuṃ aggasāvakā;
Sāgaro nāmupaṭṭhāko, sumedhassa mahesino.
24. Rāmā ceva surāmā ca, ahesuṃ aggasāvika;
Bodhi tassa bhagavato, mahānīpoti vuccati.
25. Uruvelā yasavā ca, ahesuṃ aggupaṭṭhakā;
Yasodharā sirimā ca [yasā nāma sirimā ca (syā. kaṃ.)], ahesuṃ aggupaṭṭhikā.
26. Aṭṭhāsītiratanāni, accuggato mahāmuni;
Obhāseti disā sabbā, cando tāragaṇe yathā.
27. Cakkavattimaṇī nāma, yathā tapati yojanaṃ;
Tatheva tassa ratanaṃ, samantā pharati yojanaṃ.
28. Navutivassasahassāni, āyu vijjati tāvade;
Tāvataṃ tiṭṭhamāno so, tāresi janataṃ bahuṃ.
29. Tevijjachaḷabhiññehi, balappaṭṭhehi tādihi;
Samākulamidaṃ āsi, arahantehi sādhuhi.
30. Tepi sabbe amitayasā, vippamuttā nirūpadhī;
Ñāṇālokaṃ dassayitvā, nibbutā te mahāyasā.
31. Sumedho jinavaro buddho, medhārāmamhi nibbuto;
Dhātuvitthārikaṃ āsi, tesu tesu padesatoti.

Sumedhassa bhagavato vaṃso ekādasamo.

14. Sujātabuddhavaṃso

1. Tattheva maṇḍakappamhi, sujāto nāma nāyako;
Sīhahanusabhakkhandho, appameyyo durāsado.
2. Candova vimalo suddho, sataraṃsīva patāpavā;
Evaṃ sobhati sambuddho, jalanto siriyā sadā.

3. Pāpuṇitvāna sambuddho, kevalaṃ bodhimuttamaṃ;
Sumaṅgalamhi nagare, dhammacakkaṃ pavattayi.
4. Desente [desento (syā. kaṃ.)] pavaraṃ dhammaṃ, sujāte lokanāyake [sujāto lokanāyako (syā. kaṃ.)];
Asītkoṭī abhisamiṃsu, paṭhame dhammadesane.
5. Yadā sujāto amitayaso, deve vassaṃ upāgami;
Sattatiṃsasatasahassānaṃ, dutiyābhisamayo ahu.
6. Yadā sujāto asamasamo, upagacchi pitusantikaṃ;
Saṭṭhisatasahassānaṃ [sattatiṃsasahasassānaṃ (sī.)], tatiyābhisamayo ahu.
7. Sannipātā tayo āsumaṃ, sujātassa mahesino;
Khīṇāsavānaṃ vimalānaṃ, santacittāna tādinaṃ.
8. Abhiññābalappattānaṃ, appattānaṃ bhavābhavā;
Saṭṭhisatasahasassāni, paṭhamaṃ sannipatiṃsu te.
9. Punāparaṃ sannipāte, tidivorohaṇe jine;
Paññāsahasahasassānaṃ, dutiyo āsi samāgamo.
10. Upasaṅkamanto narāsabhaṃ, tassa yo aggasāvako;
Catūhi satasahasasehi, sambuddhaṃ upasaṅkami.
11. Ahaṃ tena samayena, catudīpamhi issaro;
Antalikkhacaro āsiṃ, cakkavattī mahabbalo.
12. Loke acchariyaṃ disvā, abbhutaṃ lomahaṃsanaṃ;
Upagantvāna vandim so, sujātaṃ lokanāyakaṃ.
13. Catudīpe mahārajjaṃ, ratane satta uttame;
Buddhe niyyādayitvāna, pabbajim tassa santike.
14. Ārāmikā janapade, uṭṭhānaṃ paṭipinḍiya;
Upanenti bhikkhusaṅghassa, paccayaṃ sayanāsaṃ.
15. Sopi maṃ buddho [tadā (syā. kaṃ.)] byākāsi, dasahasassimhi issaro;
“Tiṃsakappasahasassamhi, ayaṃ buddho bhavissati.
16. “Padhānaṃ padahitvāna...pe... hessāma sammukhā imaṃ”.
17. Tassāpi vacanaṃ sutvā, bhiyyo hāsaṃ janesahaṃ;
Adhiṭṭhahim vataṃ uggamaṃ, dasapāramipūriyā.
18. Suttantaṃ vinayañcāpi, navaṅgaṃ satthusāsaṃ;
Sabbhaṃ pariyāpuṇitvāna, sobhayim jinasāsaṃ.
19. Tathappamatto viharanto, brahmaṃ bhāvetva bhāvanaṃ;
Abhiññāpāramim gantvā, brahmalokamagañchahaṃ.
20. Sumaṅgalaṃ nāma nagaraṃ, uggato nāma khattiyo;
Mātā pabhāvatī nāma, sujātassa mahesino.

21. Navavassasahassāni, agāraṃ ajjha so vasi;
Sirī upasirī nando, tayo pāsādamuttamā.
22. Tevīsatisahassāni, nāriyo samalaṅkatā;
Sirinandā nāma nārī, upaseno nāma atrajo.
23. Nimitte caturo disvā, assayānena nikkhami;
Anūnanavamāsāni, padhānaṃ padahī jino.
24. Brahmunā yācito santo, sujāto lokanāyako;
Vatti cakkam mahāvīro, sumaṅgaluyyānamuttame.
25. Sudassano sudevo ca, ahesuṃ aggasāvakā;
Nārado nāmupaṭṭhāko, sujātassa mahesino.
26. Nāgā ca nāgasamālā ca, ahesuṃ aggasāvīkā;
Bodhi tassa bhagavato, mahāveḷūti vuccati.
27. So ca rukkho ghanakkhandho [ghanaruciro (sī. ka.)], acchiddo hoti pattiko;
Uju vaṃso brahā hoti, dassanīyo manoramo.
28. Ekakkhandho pavaḍḍhitvā, tato sākḥā pabhijjati;
Yathā subaddho morahattho, evaṃ sobhati so dumo.
29. Na tassa kaṅṭakā honti, nāpi chiddaṃ mahā ahu;
Vitthiṇṇasākḥo aviralo, sandacchāyo manoramo.
30. Sudatto ceva citto ca, ahesuṃ aggupaṭṭhakā;
Subhaddā ca padumā ca, ahesuṃ aggupaṭṭhikā.
31. Paññāsaratanā āsi, uccattanena so jino;
Sabbākāravārūpeto, sabbaguṇamupāgato.
32. Tassa pabhā asamasamā, niddhāvati samantato;
Appamāṇo atuliyō, opammehi anūpamo.
33. Navutivassasahassāni, āyu vijjati tāvade;
Tāvātā tiṭṭhamāno so, tāresi janataṃ bahuṃ.
34. Yathāpi sāgare ūmī, gagane tārakā yathā;
Evaṃ tadā pāvacaṇaṃ, arahantehi cittitaṃ [cittakaṃ (syā. kaṃ.)].
35. So ca buddho asamasamo, guṇāni ca tāni atuliyāni;
Sabbam tamantarahaṭṭaṃ, nanu rittā sabbasaṅkhārā.
36. Sujāto jinavaro buddho, silārāmamhi nibbuto;
Tattheva tassa cetiyo [tattheva cetiyo satthu (syā. kaṃ.)], tīṇigāvutamuggatoti.

Sujātassa bhagavato vaṃso dvādasamo.

15. Piyadassībuddhavaṃso

1. Sujātassa aparena, sayambhū lokanāyako;
Durāsado asamasamo, piyadassī mahāyaso.
2. Sopi buddho amitayaso, ādiccova virocati;
Sabbam tamaṃ nihantvāna, dhammacakkaṃ pavattayi.
3. Tassāpi atulatejassa, ahesuṃ abhisamayā tayo;
Koṭisatasahassānaṃ, paṭhamābhisamayo ahu.
4. Sudassano devarājā, micchādiṭṭhimarocayi;
Tassa diṭṭhiṃ vinodento, satthā dhammadesayi.
5. Janasannipāto atulo, mahāsannipatī tadā;
Navutikoṭisahasānaṃ, dutiyābhisamayo ahu.
6. Yadā doṇamukhaṃ hatthiṃ, vinesi naraśārathi;
Asītikotiśahasānaṃ, tatiyābhisamayo ahu.
7. Sannipātā tayo āsuṃ, tassāpi piyadassino;
Koṭisatasahasānaṃ, paṭhamo āsi samāgamo.
8. Tato paraṃ navutikoṭī, samimsu ekato munī;
Tatiye sannipātamhi, asītikotiyo ahū.
9. Ahaṃ tena samayena, kassapo nāma brāhmaṇo [mānavo (syā. kaṃ.)];
Ajjhāyako mantadharo, tiṇṇaṃ vedāna pāragū.
10. Tassa dhammaṃ suṇitvāna, pasādaṃ janayiṃ ahaṃ;
Koṭisatasahasēhi, saṅghārāmaṃ amāpayiṃ.
11. Tassa datvāna ārāmaṃ, haṭṭho saṃviggamānaso;
Saraṇe pañca sīle ca [saraṇaṃ pañcasīlaṇca (sī.)], daḷhaṃ katvā samādiyim.
12. Sopi maṃ buddho byākāsi, saṅghamajjhe nisīdiya;
“Aṭṭhārase kappasate, ayaṃ buddho bhavissati.
13. “Padhānaṃ padahitvāna...pe... hessāma sammukhā imaṃ”.
14. Tassāpi vacanaṃ sutvā, bhiiyo cittaṃ pasādayiṃ;
Uttariṃ vatamadhiṭṭhāsiṃ, dasapāramipūriyā.
15. Sudhaññaṃ nāma nagaraṃ, sudatto nāma khattiyo;
Candā nāmāsi janikā, piyadassissa satthuno.
16. Navavassasahasāni, agāraṃ ajjha so vasi;
Sunimmalavimalagiriguhā, tayo pāsādamuttamā.
17. Tettiṃsasahasāni ca, nāriyo samalaṅkatā;
Vimalā nāma nārī ca, kañcanāveḷo nāma atrajo.
18. Nimitte caturo disvā, rathayānena nikkhami;
Chamāsaṃ padhānacāraṃ, acarī purisuttamo.

19. Brahmunā yācito santo, piyadassī mahāmuni;
Vatti cakkam mahāvīro, usabhuyyāne manorame.
20. Pālito sabbadassī ca, ahesum aggasāvakā;
Sobhito nāmupaṭṭhāko, piyadassissa satthuno.
21. Sujātā dhammadinnā ca, ahesum aggasāvikā;
Bodhi tassa bhagavato, kakudhoti pavuccati.
22. Sandhako dhammako ceva, ahesum aggupaṭṭhakā;
Visākhā dhammadinnā ca, ahesum aggupaṭṭhikā.
23. Sopi buddho amitayaso, dvattimsavaralakkhaṇo;
Asīhatthamubbedho, sālārājāva dissati.
24. Aggicandasūriyānaṃ, natthi tādisikā pabhā;
Yathā ahu pabhā tassa, asamassa mahesino.
25. Tassāpi devadevassa, āyu tāvatakaṃ ahu;
Navutivassasahassāni, loke aṭṭhāsi cakkhumā.
26. Sopi buddho asamasamo, yugānipi tāni atuliyāni;
Sabbam tamantarahaṭṭam, nanu rittā sabbasaṅkhārā.
27. Piyadassī munivaro, assatthārāmamhi nibbuto;
Tatthevassa jinathūpo, tīṇiyojanamuggatoti.

Piyadassissa bhagavato vaṃso terasamo.

16. Atthadassībuddhavaṃso

1. Tattheva maṇḍakappamhi, atthadassī mahāyaso;
Mahātamaṃ nihantvāna, patto sambodhimuttamaṃ.
2. Brahmunā yācito santo, dhammacakkaṃ pavattayi;
Amatena tappayī lokaṃ, dasasahassisadevakaṃ.
3. Tassāpi lokanāthassa, ahesum abhisamayā tayo;
Koṭisatasahassānaṃ, paṭhamābhisamayo ahu.
4. Yadā buddho atthadassī, carate devacārikaṃ;
Koṭisatasahassānaṃ, dutiyābhisamayo ahu.
5. Punāparaṃ yadā buddho, desesi pitusantike;
Koṭisatasahassānaṃ, tatiyābhisamayo ahu.
6. Sannipātā tayo āsum, tassāpi ca mahesino;
Khīṇāsavānaṃ vimalānaṃ, santacittāna tādinaṃ.
7. Aṭṭhanavutisahasassānaṃ, paṭhamo āsi samāgamo;
Aṭṭhāsītisahasassānaṃ, dutiyo āsi samāgamo.

8. Aṭṭhasattatisatasahassānaṃ, tatiyo āsi samāgamo;
Anupādā vimuttānaṃ, vimalānaṃ mahesinaṃ.
9. Ahaṃ tena samayena, jaṭilo uggatāpano;
Susīmo nāma nāmena, mahiyā seṭṭhasammato.
10. Dibbaṃ mandāraṃ pupphaṃ, padumaṃ pārīchattakaṃ;
Devalokāharitvāna, sambuddhamabhipūjayiṃ.
11. Sopi maṃ buddho byākāsi, atthadassī mahāmuni;
“Aṭṭhārase kappasate, ayaṃ buddho bhavissati.
12. “Padhānaṃ padahitvāna...pe... hessāma sammukhā imaṃ”.
13. Tassāpi vacanaṃ sutvā, haṭṭho [tuṭṭho (syā. kaṃ.)] saṃviggamānaso;
Uttariṃ vatamadhiṭṭhāsiṃ, dasapāramipūriyā.
14. Sobhaṇaṃ nāma nagaraṃ, sāgaro nāma khattiyo;
Sudassanā nāma janikā, atthadassissa satthuno.
15. Dasavassasahassāni, agāraṃ ajjha so vasi;
Amaragiri sugiri vāhanā, tayo pāsādamuttamā.
16. Tettiṃsaṅca sahasāni, nāriyo samalaṅkatā;
Visākhā nāma nārī ca, selo nāmāsi atrajo.
17. Nimitte caturo disvā, assayānena nikkhami;
Anūnaaṭṭhamāsāni, padhānaṃ padahī jino.
18. Brahmunā yācito santo, atthadassī mahāyaso;
Vatti cakkamaṃ mahāvīro, anomuyyāne narāsabho.
19. Santo ca upasanto ca, ahesuṃ aggasāvakaṃ;
Abhayo nāmupaṭṭhāko, atthadassissa satthuno.
20. Dhammā ceva sudhammā ca, ahesuṃ aggasāvikaṃ;
Bodhi tassa bhagavato, campakoti pavuccati.
21. Nakulo ca nisabho ca, ahesuṃ aggupaṭṭhakā;
Makilā ca sunandā ca, ahesuṃ aggupaṭṭhikā.
22. Sopi buddho asamasamo, asītihatthamuggato;
Sobhate sālarājāva, uḷurājāva pūrito.
23. Tassa pākatikā raṃsī, anekasatakoṭiyo;
Uddhaṃ adho dasa disā, pharanti yojanaṃ sadā.
24. Sopi buddho narāsabho, sabbasattuttamo muni;
Vassasatasahassāni, loke aṭṭhāsi cakkhumā.
25. Atulaṃ dassetvā obhāsaṃ, virocetvā sadevake [atulaṃ dassayitvāna, obhāsetvā sadevake (sī. ka.)];
Sopi aniccatamaṃ patto, yathaggupādānasaṅkhaṃ.

26. Atthadassī jinavaro, anomārāmamhi nibbuto;
Dhātuvitthārikam āsi, tesu tesu padesatoti.

Atthadassissa bhagavato vaṃso cuddasamo.

17. Dhammadassībuddhavāṃso

1. Tattheva maṇḍakappamhi, dhammadassī mahāyaso;
Tamandhakāraṃ vidhamitvā, atirocati sadevake.
2. Tassāpi atulatejassa, dhammacakkappavattane;
Koṭisatasahassānaṃ, paṭhamābhisamayo ahu.
3. Yadā buddho dhammadassī, vinesi sañjayaṃ isiṃ;
Tadā navutikoṭīnaṃ, dutiyābhisamayo ahu.
4. Yadā sakko upāgañchi, sapaṇiso vināyakaṃ;
Tadā asītikoṭīnaṃ, tatiyābhisamayo ahu.
5. Tassāpi devadevassa, sannipātā tayo ahuṃ [āsuṃ (sī. syā.)];
Khīṇāsavānaṃ vimalānaṃ, santacittāna tādīnaṃ.
6. Yadā buddho dhammadassī, saraṇe vassaṃ upāgami;
Tadā koṭisatasahassānaṃ [koṭisahassānaṃ (sī. syā. kaṃ.)], paṭhamo āsi samāgamo.
7. Punāparaṃ yadā buddho, devato eti mānusaṃ;
Tadāpi satakoṭīnaṃ, dutiyo āsi samāgamo.
8. Punāparaṃ yadā buddho, pakāsesi dhute guṇe;
Tadā asītikoṭīnaṃ, tatiyo āsi samāgamo.
9. Ahaṃ tena samayena, sakko āsiṃ purindado;
Dibbena gandhamālena, turiyenābhipūjayiṃ.
10. Sopi maṃ buddho byākāsi, devamajjhe nisīdiya;
“Aṭṭhārase kappasate, ayaṃ buddho bhavissati.
11. “Padhānaṃ padahitvāna...pe... hessāma sammukhā imaṃ”.
12. Tassāpi vacanaṃ sutvā, bhiyyo cittaṃ pasādayiṃ;
Uttariṃ vatamadhiṭṭhāsiṃ, dasapāramipūriyā.
13. Saraṇaṃ nāma nagaraṃ, saraṇo nāma khattiyo;
Sunandā nāma janikā, dhammadassissa satthuno.
14. Aṭṭhavassasahassāni, agāraṃ ajjha so vasi;
Arajo virajo sudassano, tayo pāsādamuttamā.
15. Ticattārīsasahassāni [cattālīsasahassāni (syā. kaṃ.)], nāriyo samalaṅkatā;
Vicikoḷi nāma nārī, atrajo puñṇavaḍḍhano.
16. Nimitte caturo disvā, pāsādenābhinikkhami;

Sattāhaṃ padhānacāraṃ, acarī purisuttamo.

17. Brahmunā yācito santo, dhammadassī narāsabho;
Vatti cakkhaṃ mahāvīro, migadāye naruttamo.
18. Padumo phussadevo ca, ahesuṃ aggasāvaka;
Sunetto [sudatto (syā. kaṃ.)] nāmuṃpaṭṭhāko, dhammadassissa satthuno.
19. Khemā ca saccaṇāmā ca, ahesuṃ aggasāvikā;
Bodhi tassa bhagavato, bimbijālota vuccati.
20. Subhaddo kaṭṭissaho ceva, ahesuṃ aggupatṭhakā;
Sāliyā [sālisā (syā. kaṃ.)] ca kaṭṭiyā ca, ahesuṃ aggupatṭhikā.
21. Sopi buddho asamasamo, asītihatthamuggato;
Atirocati tejena, dasasahassimhi dhātuyā.
22. Suphullo sālārājāva, vijjūva gagane yathā;
Majjhanhikeva sūriyo, evaṃ so upasobhatha.
23. Tassāpi atulatejassa, samakaṃ āsi jīvitāṃ;
Vassasatasahassāni, loke aṭṭhāsi cakkhumā.
24. Obhāsaṃ dassayitvāna, vimalaṃ katvāna sāsanaṃ;
Cavi candova gagane, nibbuto so sasāvako.
25. Dhammadassī mahāvīro, sālārāmamhi nibbuto;
Tatthevassa thūpavaro, tīṇiyojanamuggatoti.

Dhammadassissa bhagavato vaṃso pannarasamo.

18. Siddhatthabuddhavaṃso

1. Dhammadassissa aparena, siddhattho nāma nāyako;
Nihanitvā tamaṃ sabbaṃ, sūriyo abbhuggato yathā.
2. Sopi patvāna sambodhiṃ, santārento sadevakaṃ;
Abhivassi dhammameghena, nibbāpento sadevakaṃ.
3. Tassāpi atulatejassa, ahesuṃ abhisamayā tayo;
Koṭṭisatasahassānaṃ, paṭṭhamābhisamayo ahu.
4. Punāparaṃ bhīmarathe [hīmaratṭhe (ka.)], yadā āhani dundubhiṃ;
Tadā navutikoṭṭinaṃ, dutiyābhisamayo ahu.
5. Yadā buddho dhammaṃ desesi, vebhāre so puruttame;
Tadā navutikoṭṭinaṃ, tatiyābhisamayo ahu.
6. Sannipātā tayo āsuṃ, tasmimpi dvipaduttame;
Khīṇāsavānaṃ vimalānaṃ, santacittāna tāḍinaṃ.

7. Koṭṭisatānaṃ navutīnaṃ [navutiya (syā. kaṃ.)], asītiyāpi ca koṭṭinaṃ;
Ete āsuṃ tayo ṭhānā, vimalānaṃ samāgame.
8. Ahaṃ tena samayena, maṅgalo nāma tāpaso;
Uggatejo duppasaho, abhiññābalasamāhito.
9. Jambuto phalamānetvā [phalamāhatvā (sī. syā.)] siddhatthassa adāsahaṃ;
Paṭiggahetvā sambuddho, idaṃ vacanamabravi.
10. “Passatha imaṃ tāpasam, jaṭilaṃ uggatāpanaṃ;
Catunnavutito kappe, ayaṃ buddho bhavissati.
11. “Padhānaṃ padahitvāna...pe... hessāma sammukhā imaṃ”.
12. Tassāpi vacanaṃ sutvā, bhīyyo cittaṃ pasādayiṃ;
Uttariṃ vatamadhiṭṭhāsiṃ, dasapāramipūriyā.
13. Vebhāraṃ nāma nagaraṃ, udeno nāma khattiyo;
Suphassā nāma janikā, siddhatthassa mahesino.
14. Dasavassasahassāni, agāraṃ ajjha so vasi;
Kokāsuppalakokanadā, tayo pāsādamuttamā.
15. Tisoḷasasahassāni, nāriyo samalaṅkatā;
Somanassā nāma sā nārī, anupamo nāma atrajo.
16. Nimitte caturo disvā, siviḱāyābhiniḱkhami;
Anūnadasamāsāni, padhānaṃ padahī jino.
17. Brahmunā yācito santo, siddhattho lokanāyako;
Vatti cakkam mahāvīro, migadāye naruttamo.
18. Sambalo ca sumitto ca, ahesuṃ aggasāvakā;
Revato nāmupaṭṭhāko, siddhatthassa mahesino.
19. Sīvalā ca surāmā ca, ahesuṃ aggasāvikā;
Bodhi tassa bhagavato, kaṇikāroti vuccati.
20. Suppiyo ca samuddo ca, ahesuṃ aggupaṭṭhakā;
Rammā ceva surammā ca, ahesuṃ aggupaṭṭhikā.
21. So buddho saṭṭhiratanaṃ, ahosi nabhamuggato;
Kaṇcanagghiyasāṅkāso, dasasahassī virocati.
22. Sopi buddho asamasamo, atulo appaṭipuggalo;
Vassasatasahassāni, loke aṭṭhāsi cakkhumā.
23. Vipulaṃ pabhaṃ dassayitvā, pupphāpetvāna sāvake;
Vilāsetvā samāpatyā, nibbuto so sasāvako.
24. Siddhattho munivaro buddho, anomārāmamhi nibbuto;
Tatthevassa thūpavaro, catuyojanamuggatoti.

Siddhatthassa bhagavato vaṃso soḷasamo.

19. Tissabuddhavaṃso

1. Siddhatthassa aparena, asamo appaṭipuggalo;
Anantatejo amitayaso, tisso lokagganāyako.
2. Tamandhakāraṃ vidhamitvā, obhāsetvā sadevakam;
Anukampako mahāvīro, loke uppajji cakkhumā.
3. Tassāpi atulā iddhi, atulaṃ sīlaṃ samādhi ca;
Sabbattha pāramiṃ gantvā, dhammacakkaṃ pavattayi.
4. So buddho dasasahassimhi, viññāpesi giraṃ sucim;
Koṭṭisatāni abhisamiṃsu, paṭhame dhammadesane.
5. Duttiyo navutikoṭṭinaṃ, tatiyo saṭṭhikoṭṭiyo;
Bandhanāto pamocesi, satte [samppatte (ka.)] naramarū tadā.
6. Sannipātā tayo āsum, tisse lokagganāyake;
Khīṇāsavānaṃ vimalānaṃ, santacittāna tādinaṃ.
7. Khīṇāsavasatasahassānaṃ, paṭhamo āsi samāgamo;
Navutisatasahassānaṃ, duttiyo āsi samāgamo.
8. Asītisatasahassānaṃ, tatiyo āsi samāgamo;
Khīṇāsavānaṃ vimalānaṃ, pupphitānaṃ vimuttiyā.
9. Ahaṃ tena samayena, sujāto nāma khattiyo;
Mahābhogaṃ chaḍḍayitvā, pabbajim isipabbajam.
10. Mayi pabbajite sante, uppajji lokanāyako;
Buddhoti saddaṃ sutvāna, pīti me upapajjatha.
11. Dibbaṃ mandāraṃ pupphaṃ, padumaṃ pārichattakam;
Ubho hatthehi paggayha, dhunamāno upāgamim.
12. Catuvaṇṇaparivutaṃ, tissaṃ lokagganāyakam;
Tamaḥam pupphaṃ gahetvā, matthake dhārayim jinam.
13. Sopi maṃ buddho byākāsi, janamajjhe nisīdiya;
“Dvenavute ito kappe, ayaṃ buddho bhavissati.
14. “Padhānaṃ padahitvāna...pe... hessāma sammukhā imam”.
15. Tassāpi vacanaṃ sutvā, bhiiyo cittaṃ pasādayim;
Uttariṃ vatamadhiṭṭhāsim, dasapāramipūriyā.
16. Khemakaṃ nāma nagaraṃ, janasandho nāma khattiyo;
Padumā nāma janikā, tissassa ca mahesino.
17. Sattavassasahassāni, agāraṃ ajjha so vasi;

Guhāsela nārisaya nisabhā [kumudo nāḷiyo padumo (ka.)], tayo pāsādamuttamā.

18. Samatiṃsasahassāni, nāriyo samalaṅkatā;
Subhaddānāmikā nārī, ānando nāma atrajo.
19. Nimitte caturo disvā, assayānena nikkhami;
Anūnaaṭṭhamāsāni, padhānaṃ padahī jino.
20. Brahmunā yācito santo, tisso lokagganāyako;
Vatti cakkam mahāvīro, yasavatiyamuttame.
21. Brahmadevo udayo ca, ahesuṃ aggasāvakā;
Samaṅgo nāmupaṭṭhāko, tissassa ca mahesino.
22. Phussā ceva sudattā ca, ahesuṃ aggasāvikā;
Bodhi tassa bhagavato, asanoti pavuccati.
23. Sambalo ca sirimā ceva, ahesuṃ aggupaṭṭhakā;
Kisāgotamī upasenā, ahesuṃ aggupaṭṭhikā.
24. So buddho saṭṭhiratano, ahu uccattane jino;
Anūpamo asadiso, himavā viya dissati.
25. Tassāpi atulatejassa, āyu āsi anuttaro;
Vassasatasahassāni, loke aṭṭhāsi cakkhumā.
26. Uttamaṃ pavaraṃ seṭṭham, anubhotvā mahāyasam;
Jalivā aggikkhandhova, nibbuto so sasāvako.
27. Valāhakova anilena, sūriyena viya ussavo;
Andhakārova padīpena, nibbuto so sasāvako.
28. Tisso jinavaro buddho, nandārāmamhi nibbuto;
Tatthevassa jinathūpo, tīṇiyojanamuggatoti.

Tissassa bhagavato vaṃso sattarasamo.

20. Phussabuddhavaṃso

1. Tattheva maṇḍakappamhi, ahu sathā anuttaro;
Anupamo asamasamo, phusso lokagganāyako.
2. Sopi sabbam tamam hantvā, vijaṭetvā mahājaṭam;
Sadevakaṃ tappayanto, abhivassi amatambunā.
3. Dhammacakkaṃ pavattente, phusse nakkhattamaṅgale;
Koṭṭisatasahassānaṃ, paṭṭhamābhisamayo ahu.
4. Navutisatasahassānaṃ, dutiyābhisamayo ahu;
Asītisatasahassānaṃ, tatiyābhisamayo ahu.

5. Sannipātā tayo āsum, phussassāpi mahesino;
Khīṇāsavānaṃ vimalānaṃ, santacittāna tādinaṃ.
6. Saṭṭhisatasahassānaṃ, paṭṭhama āsi samāgamo;
Paññāsasatasahassānaṃ, dutiyo āsi samāgamo.
7. Cattārīsatasahassānaṃ, tatiyo āsi samāgamo;
Anupādā vimuttānaṃ, vocchinnapaṭisandhinaṃ.
8. Ahaṃ tena samayena, vijitāvī nāma khattiyo;
Chaḍḍayitvā mahārajjaṃ, pabbajim tassa santike.
9. Sopi maṃ buddho byākāsi, phusso lokagganāyako;
“Dvenavute ito kappe, ayaṃ buddho bhavissati.
10. “Padhānaṃ padahitvāna...pe... hessāma sammukhā imaṃ”.
11. Tassāpi vacanaṃ sutvā, bhiyyo cittaṃ pasādayim;
Uttarim vatamadhiṭṭhāsim, dasapāramipūriyā.
12. Suttantaṃ vinayañcāpi, navāṅgaṃ satthusāsaṇaṃ;
Sabbāṃ pariyāpuṇitvā, sobhayim jinasāsaṇaṃ.
13. Tathappamatto viharanto, brahmaṃ bhāvetva bhāvaṇaṃ;
Abhiññāsu pāraṃim gantvā, brahmalokamagañchahaṃ.
14. Kāsikaṃ nāma nagaraṃ, jayaseno nāma khattiyo;
Sirimā nāma janikā, phussassāpi mahesino.
15. Navavassasahassāni, agāraṃ ajjha so vasi;
Garūḷapakkha haṃsa suvaṇṇabhārā, tayo pāsādamuttamā.
16. Tiṃsaitthisahassāni, nāriyo samalaṅkatā;
Kisāgotamī nāma nārī, anūpamo nāma atrajo.
17. Nimitte caturo disvā, hatthiyānena nikkhami;
Chamāsaṃ padhānacāraṃ, acarī purisuttamo.
18. Brahmunā yācito santo, phusso lokagganāyako;
Vatti cakkāṃ mahāvīro, migadāye naruttamo.
19. Surakkhito dhammaseno, ahesuṃ aggasāvakā;
Sabhiyo nāmuṇḍhāko, phussassāpi mahesino.
20. Cālā ca upacālā ca, ahesuṃ aggasāvikā;
Bodhi tassa bhagavato, āmaṇḍoti pavuccati.
21. Dhanañcayo visākho ca, ahesuṃ aggupaṭṭhakā;
Padumā ceva nāgā ca, ahesuṃ aggupaṭṭhikā.
22. Aṭṭhapaṇṇāsaratanaṃ, sopi accuggato muni;
Sobhate sataraṃsīva, uḷurājāva pūrito.

23. Navutivassasahassāni, āyu vijjati tāvade;
Tāvātā tiṭṭhamāno so, tāresi janataṃ bahuṃ.
24. Ovaditvā bahū satte, santāretvā bahū jane;
Sopi satthā atulayaso, nibbuto so sasāvako.
25. Phusso jinavaro satthā, senārāmamhi nibbuto;
Dhātuvitthārikaṃ āsi, tesu tesu padesatoti.

Phussassa bhagavato vaṃso aṭṭhārasamo.

21. Vipassībuddhavaṃso

1. Phussassa ca aparena, sambuddho dvipaduttamo;
Vipassī nāma nāmena, loke uppajji cakkhumā.
 2. Avijjaṃ sabbaṃ padāletvā, patto sambodhimuttamaṃ;
Dhammacakkaṃ pavattetuṃ, pakkāmi bandhumatīpuraṃ.
 3. Dhammacakkaṃ pavattetvā, ubho bodhesi nāyako;
Gaṇanāya na vattabbo, paṭhamābhisamayo ahu.
 4. Punāparaṃ amitayaso, tattha saccaṃ pakāsayi;
Caturāsītisahassānaṃ, dutiyābhisamayo ahu.
 5. Caturāsītisahassāni, sambuddhaṃ anupabbajuṃ;
Tesamārāmapattānaṃ, dhammaṃ desesi cakkhumā.
 6. Sabbākārena bhāsato, sutvā upanisādino [upanissā jino (syā. kaṃ.)];
Tepi dhammavaraṃ gantvā, tatiyābhisamayo ahu.
 7. Sannipātā tayo āsum, vipassissa mahesino;
Khīṇāsavānaṃ vimalānaṃ, santacittāna tādinaṃ.
 8. Aṭṭhasaṭṭhisatasahassānaṃ, paṭhamo āsi samāgamo;
Bhikkhusatasahassānaṃ, dutiyo āsi samāgamo.
 9. Asītibhikkhusahassānaṃ, tatiyo āsi samāgamo;
Tattha bhikkhugaṇamajjhe, sambuddho atirocati.
 10. Ahaṃ tena samayena, nāgarājā mahiddhiko;
Atulo nāma nāmena, puñṇavanto jutindharo.
 11. Nekānaṃ nāgakoṭīnaṃ, parivāretvānahaṃ tadā;
Vajjanto dibbaturiyehi, lokajetthaṃ upāgamiṃ.
 12. Upasaṅkamtivā sambuddhaṃ, vipassiṃ lokanāyakaṃ;
Maṇimuttaratanakhacitaṃ, sabbābharaṇavibhūsitāṃ;
- Nimantetvā dhammarājassa, suvaṇṇapīṭhamadāsahaṃ.

13. Sopi maṃ buddho byākāsi, saṅghamajjhe nisīdiya;
“Ekanavutito kappe, ayaṃ buddho bhavissati.
14. “Ahu kapilavhayā rammā, nikkhamitvā tathāgato;
Padhānaṃ padahitvāna, katvā dukkarakārikaṃ.
15. “Ajapālarukkhamūlasmiṃ, nisīditvā tathāgato;
Tattha pāyāsaṃ paggayha, nerañjaramupehiti.
16. “Nerañjarāya tīramhi, pāyāsaṃ ada so jino;
Paṭiyattavaramaggena, bodhimūlamupehiti.
17. “Tato padakkhiṇaṃ katvā, bodhimaṇḍaṃ anuttaro;
Assatthamūle sambodhiṃ, bujjhissati mahāyaso.
18. “Imassa janikā mātā, māyā nāma bhavissati;
Pitā suddhodano nāma, ayaṃ hessati gotamo.
19. “Anāsavā vītarāgā, santacittā samāhitā;
Kolito upatisso ca, aggā hessanti sāvakā;
Ānando nāmupaṭṭhāko, upaṭṭhissatimaṃ jinaṃ.
20. “Khemā uppalavaṇṇā ca, aggā hessanti sāvikā;
Anāsavā vītarāgā, santacittā samāhitā;
Bodhi tassa bhagavato, assatthoti pavuccati.
21. “Citto ca hatthāḷavako, aggā hessantupaṭṭhakā;
Nandamātā ca uttarā, aggā hessantupaṭṭhikā;
Āyu vassasataṃ tassa, gotamassa yasassino.
22. “Idaṃ sutvāna vacanaṃ...pe... hessāma sammukhā imaṃ”.
23. Tassāhaṃ vacanaṃ sutvā, bhiyyo cittaṃ pasādayiṃ;
Uttariṃ vatamadhiṭṭhāsiṃ, dasapāramipūriyā.
24. Nagaraṃ bandhumatī nāma, bandhumā nāma khattiyo;
Mātā bandhumatī nāma, vipassissa mahesino.
25. Aṭṭhavassasahassāni, agāraṃ ajjha so vasi;
Nando sunando sirimā, tayo pāsādamuttamā.
26. Ticattārīsasahassāni, nāriyo samalaṅkatā;
Sudassanā nāma sā nārī, samavattakkhandho nāma atrajo.
27. Nimitte caturo disvā, rathayānena nikkhami;
Anūnaaṭṭhamāsāni, padhānaṃ padahī jino.
28. Brahmunā yācito santo, vipassī lokanāyako;
Vatti cakkamaṃ mahāvīro, migadāye naruttamo.
29. Khaṇḍo ca tissanāmo ca, ahesuṃ aggasāvakā;
Asoko nāmupaṭṭhāko, vipassissa mahesino.

30. Candā ca candamittā ca, ahesuṃ aggasāvīkā;
Bodhi tassa bhagavato, pāḷālīti pavuccati.
31. Punabbasumitto nāgo ca, ahesuṃ aggupaṭṭhakā;
Sirimā uttarā ceva, ahesuṃ aggupaṭṭhikā.
32. Asītihatthamubbedho, vipassī lokanāyako;
Pabhā niddhāvati tassa, samantā sattayojane.
33. Asītivassasahassāni, āyu buddhassa tāvade;
Tāvātā tiṭṭhamāno so, tāresi janataṃ bahuṃ.
34. Bahudevamanussānaṃ, bandhanā parimocayi;
Maggāmaggañca ācikkhi, avasesaputhujjane.
35. Ālokaṃ dassayitvāna, desetvā amataṃ padaṃ;
Jalivā aggikkhandhova, nibbuto so sasāvako.
36. Iddhivaraṃ puññavaraṃ, lakkhaṇaṃ kusumitaṃ;
Sabbāṃ tamantarahitaṃ, nanu rittā sabbasaṅkhārā.
37. Vipassī jinavaro buddho, sumittārāmaṃhi nibbuto;
Tatthevassa thūpavaro, sattayojanamussitoti.

Vipassissa bhagavato vaṃso ekūnavīsatiṃ.

22. Sikhībuddhavaṃso

1. Vipassissa aparena, sambuddho dvipaduttamo;
Sikhivhaya āsi jino, asamo appaṭipuggalo.
2. Mārasenaṃ pamadditvā, patto sambodhimuttamaṃ;
Dhammacakkaṃ pavattesi, anukampāya pāṇinaṃ.
3. Dhammacakkaṃ pavattente, sikhimhi jinapuṅgave [\[munipuṅgave \(sī.\)\]](#);
Koṭisatasahassānaṃ, paṭhamābhisamayo ahu.
4. Aparampi dhammaṃ desente, gaṇasetṭhe naruttame;
Navutikoṭisahasānaṃ, dutiyābhisamayo ahu.
5. Yamakapāṭihāriyaṃ [\[yamakaṃ pāṭihāriyaṃ \(sī.\)\]](#), dassayante sadevake;
Asītikotiṭisahasānaṃ, tatiyābhisamayo ahu.
6. Sannipātā tayo āsuṃ, sikhissāpi mahesino;
Khīṇāsavānaṃ vimalānaṃ, santacittāna tādinaṃ.
7. Bhikkhusatasahasānaṃ, paṭhamo āsi samāgamo;
Asītibhikkhusahasānaṃ, dutiyo āsi samāgamo.
8. Sattatibhikkhusahasānaṃ, tatiyo āsi samāgamo;
Anupalitto padumaṃva, toyamhi sampavaḍḍhitaṃ.

9. Ahaṃ tena samayena, arindamo nāma khattiyo;
Sambuddhappamukhaṃ saṅghaṃ, annapānena tappayim.
10. Bahuṃ dussavaraṃ datvā, dussakoṭim anappakaṃ;
Alaṅkataṃ hatthiyānaṃ, sambuddhassa adāsahaṃ.
11. Hatthiyānaṃ nimminivā, kappiyaṃ upanāmayim;
Pūrayim mānasaṃ mayhaṃ, niccaṃ daḥhamupaṭṭhitaṃ.
12. Sopi maṃ buddho byākāsi, sikhī lokagganāyako;
“Ekatimse ito kappe, ayaṃ buddho bhavissati.
13. “Ahu kapilavhayā rammā...pe... hessāma sammukhā imaṃ”.
14. Tassāhaṃ vacanaṃ sutvā, bhiyyo cittaṃ pasādayim;
Uttarim vatamadhiṭṭhāsim, dasapāramipūriyā.
15. Nagaraṃ aruṇavatī nāma, aruṇo nāma khattiyo;
Pabhāvatī nāma janikā, sikhissāpi mahesino.
16. Sattavassasahassāni, agāraṃ ajjha so vasi;
Sucandako giri vasabho [[sucando girivahano \(sī.\)](#)], tayo pāsadamuttamā.
17. Catuvīsasahassāni, nāriyo samalaṅkatā;
Sabbakāmā nāma nārī, atulo nāma atrajo.
18. Nimitte caturo disvā, hatthiyānena nikkhami;
Aṭṭhamāsaṃ padhānacāraṃ, acarī purisuttamo.
19. Brahmunā yācito santo, sikhī lokagganāyako;
Vatti cakkhaṃ mahāvīro, migadāye naruttamo.
20. Abhibhū sambhavo ceva, ahesuṃ aggasāvākā;
Khemaṅkaro nāmupaṭṭhāko, sikhissāpi mahesino.
21. Sakhilā ca padumā ca, ahesuṃ aggasāvikā;
Bodhi tassa bhagavato, puṇḍarīkoti vuccati.
22. Sirivaḍḍho ca nando ca, ahesuṃ aggupaṭṭhakā;
Cittā ceva suguttā ca, ahesuṃ aggupaṭṭhikā.
23. Uccattanena so buddho, sattatihathamuggato;
Kaṅcanagghiyasāṅkāso, dvattimsavaralakkhaṇo.
24. Tassāpi byāmapabhā kāyā, divārattim niraṅtaraṃ;
Disodisaṃ niccharanti, tīṇiyojanaso pabhā.
25. Sattativassasahassāni, āyu tassa mahesino;
Tāvataṃ tiṭṭhamāno so, tāresi janataṃ bahuṃ.
26. Dhammagehaṃ pavassetvā, temayitvā sadevake;
Khemantaṃ pāpayitvāna, nibbuto so sasāvako.

27. Anubyañjanasampannaṃ, dvattiṃsavaralakkhaṇaṃ;
Sabbam tamantarahitaṃ, nanu rittā sabbasaṅkhārā.
28. Sikhī munivaro buddho, assārāmamhi nibbuto;
Tatthevassa thūpavaro, tīṇiyojanamuggatoti.

Sikhissa bhagavato vaṃso vīsatiṃ.

23. Vessabhūbuddhavaṃso

1. Tattheva maṇḍakappamhi, asamo appaṭipuggalo;
Vessabhū nāma nāmena, loke uppajji nāyako [so jino (syā. kaṃ. ka.)].
2. Ādittaṃ vata rāgaggi, taṇhānaṃ vijitaṃ tadā;
Nāgo va bandhanaṃ chetvā, patto sambodhimuttamaṃ.
3. Dhammacakkaṃ pavattente, vessabhūlokanāyake;
Asītkoṭisahassānaṃ, paṭhamābhisamayo ahu.
4. Pakkante cārikaṃ raṭṭhe, lokajetṭhe narāsabhe;
Sattatikoṭisahassānaṃ, dutiyābhisamayo ahu.
5. Mahādīṭṭhiṃ vinodento, pāṭiheraṃ karoti so;
Samāgatā naramarū, dasasahassī sadevake.
6. Mahāacchariyaṃ disvā, abbhutaṃ lomahaṃsanaṃ;
Devā ceva manussā ca, bujjhare saṭṭhikoṭiyo.
7. Sannipātā tayo āsuma, vessabhussa mahesino;
Khīṇāsavānaṃ vimalānaṃ, santacittāna tāḍinaṃ.
8. Asītibhikkhusahassānaṃ, paṭhamo āsi samāgamo;
Sattatibhikkhusahassānaṃ, dutiyo āsi samāgamo.
9. Saṭṭhibhikkhusahassānaṃ, tatiyo āsi samāgamo;
Jarādibhayabhītānaṃ, orasānaṃ mahesino.
10. Ahaṃ tena samayena, sudassano nāma khattiyo;
Nimantetvā mahāvīraṃ, dānaṃ datvā mahārahaṃ;
Annapanena vatthena, sasaṅghaṃ jina pūjayiṃ.
11. Tassa buddhassa asamassa, cakkaṃ vattitamuttamaṃ;
Sutvāna paṇitaṃ dhammaṃ, pabbajjamabhirocayiṃ.
12. Mahādānaṃ pavattetvā, rattindivamatandito;
Pabbajjaṃ guṇasampannaṃ, pabbajiṃ jinasantike.
13. Ācāraguṇasampanno, vattasīlasamāhito;
Sabbaññutaṃ gavesanto, ramāmi jinasāsane.
14. Saddhāpītiṃ upagantvā, buddhaṃ vandāmi sattharaṃ;

Pīti uppajjati mayhaṃ, bodhiyāyeva kāraṇā.

15. Anivattamānaṣaṃ ñatvā, sambuddho etadabravi;
“Ekatimse ito kappe, ayaṃ buddho bhavissati.
16. “Ahu kapilavhayā rammā...pe... hessāma sammukhā imaṃ”.
17. Tassāhaṃ vacanaṃ sutvā, bhiyyo cittaṃ pasādayiṃ;
Uttariṃ vatamadhiṭṭhāsiṃ, dasapāramipūriyā.
18. Anomaṃ nāma nagaraṃ, suppatīto nāma khattiyo;
Mātā yasavatī nāma, vessabhussa mahesino.
19. Cha ca vassasahassāni, agāraṃ ajjha so vasi;
Ruci suruci rativaḍḍhano, tayo pāsādamuttamā.
20. Anūnatiṃsasahassāni, nāriyo samalaṅkatā;
Sucittā nāma sā nārī, suppbuddho nāma atrajo.
21. Nimitte caturo disvā, siviḱāyābhiniḱkhami;
Chamāsaṃ padhānacāraṃ, acarī purisuttamo.
22. Brahmunā yācito santo, vessabhūlokanāyako;
Vatti cakkhaṃ mahāvīro, aruṇārāme naruttamo.
23. Soṇo ca uttaro ceva, ahesuṃ aggasāvakā;
Upasanto nāmupaṭṭhāko, vessabhussa mahesino.
24. Rāmā [dāmā (sī.)] ceva samālā ca, ahesuṃ aggasāvikā;
Bodhi tassa bhagavato, mahāsālotti vuccati.
25. Sotthiko ceva rambho ca, ahesuṃ aggupaṭṭhakā;
Gotamī sirimā ceva, ahesuṃ aggupaṭṭhikā.
26. Saṭṭhiratanamubbedho, hemayūpasamūpamo;
Kāyā niccharati rasmi, rattiṃva pabbate sikhī.
27. Saṭṭhivassasahassāni, āyu tassa mahesino;
Tāvataṃ tiṭṭhamāno so, tāresi janataṃ bahuṃ.
28. Dhammaṃ vitthārikaṃ katvā, vibhajitvā mahājanaṃ;
Dhammanāvamaṃ ṭhapetvāna, nibbuto so sasāvako.
29. Dassaneyyaṃ sabbajanaṃ, vihāraṃ iriyāpathaṃ;
Sabbhaṃ tamantaraḱitaṃ, nanu rittā sabbasaṅkhārā.
30. Vessabhū jinaṃvaro satthā, khemārāmaṃhi nibbuto;
Dhātuvitthārikaṃ āsi, tesu tesu padesatoti.

Vessabhussa bhagavato vaṃso ekavīsatiṃ.

24. Kakusandhabuddhavaṃso

1. Vessabhussa aparena, sambuddho dvīpaduttamo;
Kakusandho nāma nāmena, appameyyo durāsado.
2. Ugghāṭetvā sabbabhavaṃ, cariyāya pāramiṃ gato;
Sīhova pañjaraṃ bhettvā, patto sambodhimuttamaṃ.
3. Dhammacakkaṃ pavattente, kakusandhe lokanāyake;
Cattārīsakoṭisahasānaṃ, dhammābhisamayo ahu.
4. Antalikkhamhi ākāse, yamakaṃ katvā vikubbaṃ;
Tiṃsakoṭisahasānaṃ, bodhesi devamānuse.
5. Naradevassa yakkhassa, catusaccappakāsane;
Dhammābhisamayo tassa, gaṇanāto asaṅkhiyo.
6. Kakusandhassa bhagavato, eko āsi samāgamo;
Khīṇāsavānaṃ vimalānaṃ, santacittāna tādinaṃ.
7. Cattālīsasahasānaṃ, tadā āsi samāgamo;
Dantabhūmimanuppattānaṃ, āsavāriṅgaṅgakkhayā.
8. Ahaṃ tena samayena, khemo nāmāsi khattiyo;
Tathāgate jinaputte, dānaṃ datvā anappakaṃ.
9. Pattaṅca cīvaraṃ datvā, añjanaṃ madhulaṭṭhikaṃ;
Imetaṃ patthitaṃ sabbhaṃ, paṭiyādemī varaṃ varaṃ.
10. Sopi maṃ buddho byākāsi, kakusandho vināyako;
“Imamhi bhaddake kappe, ayaṃ buddho bhavissati.
11. “Ahu kapilavhayā rammā...pe... hessāma sammukhā imaṃ”.
12. Tassāpi vacanaṃ sutvā, bhiyyo cittaṃ pasādayiṃ;
Uttariṃ vatamadhiṭṭhāsiṃ, dasapāramipūriyā.
13. Nagaraṃ khemāvati nāma, khemo nāmāsahaṃ tadā;
Sabbāññutaṃ gavesanto, pabbajiṃ tassa santike.
14. Brāhmaṇo aggidatto ca, āsi buddhassa so pitā;
Visākhā nāma janikā, kakusandhassa satthuno.
15. Vasate tattha khome pure, sambuddhassa mahākulaṃ;
Narānaṃ pavaraṃ seṭṭhaṃ, jātimantaṃ mahāyasaṃ.
16. Catuvassasahasāni, agāraṃ ajjha so vasi;
Kāma -kāmavaṇṇa-kāmasuddhināmā [[suci suruci rativaddhananāmā \(sī.\)](#)], tayo
pāsādamuttamā.
17. Samatiṃsasahasāni, nāriyo samalaṅkatā;
Rocinī nāma sā nārī, uttaro nāma atrajo.
18. Nimitte caturo disvā, rathayānena nikkhami;
Anūnaaṭṭhamāsāni, padhānaṃ padahī jino.

19. Brahmunā yācito santo, kakusandho vināyako;
Vatti cakkam mahāvīro, migadāye naruttamo.
20. Vidhuro ca sañjīvo ca, ahesuṃ aggasāvakā;
Buddhijo nāmuṇṇhāko, kakusandhassa satthuno.
21. Sāmā ca campānāmā ca, ahesuṃ aggasāvikā;
Bodhi tassa bhagavato, sirīsoti pavuccati.
22. Accuto ca sumano ca, ahesuṃ aggupatthakā;
Nandā ceva sunandā ca, ahesuṃ aggupatthikā.
23. Cattālīsaranāni, accuggato mahāmuni;
Kanakappabhā niccharati, samantā dasayojanam.
24. Cattālīsavassasahassāni, āyu tassa mahesino;
Tāvātā tiṭṭhamāno so, tāresi janataṃ bahum.
25. Dhammāpaṇaṃ pasāretvā, naranārīnaṃ sadevake;
Naditvā sīhanādaṃva, nibbuto so sasāvako.
26. Aṭṭhaṅgavacanasampanno, acchiddāni niranataraṃ;
Sabbam tamantarahitaṃ, nanu rittā sabbasaṅkhārā.
27. Kakusandho jinavaro, khemārāmamhi nibbuto;
Tatthevassa thūpavaro, gāvutaṃ nabhamuggatoti.

Kakusandhassa bhagavato vaṃso dvāvīsatiṃ.

25. Koṇāgamanabuddhavaṃso

1. Kakusandhassa aparena, sambuddho dvipaduttamo;
Koṇāgamano nāma jino, lokajettho narāsabho.
2. Dasadhamme pūrayitvāna, kantāraṃ samatikkami;
Pavāhiya malaṃ sabbam, patto sambodhimuttamaṃ.
3. Dhammacakkam pavattente, koṇāgamanāyake;
Tiṃsakoṭṭisahasānaṃ, paṭhamābhisamayo ahu.
4. Pāṭihīraṃ karonte ca, paravādappamaddane;
Vīsatiṃkoṭṭisahasānaṃ, dutiyābhisamayo ahu.
5. Tato vikubbanam katvā, jino devapuraṃ gato;
Vasate tattha sambuddho, silāya paṇḍukambale.
6. Pakaraṇe satta desento, vassaṃ vasati so muni;
Dasakoṭṭisahasānaṃ, tatiyābhisamayo ahu.
7. Tassāpi devadevassa, eko āsi samāgamo;
Khīṇāsavānaṃ vimalānaṃ, santacittāna tāḍinaṃ.

8. Tiṃsabhikkhusahassānaṃ, tadā āsi samāgamo;
Oghānamatikkantānaṃ, bhijjitānañca maccuyā.
9. Ahaṃ tena samayena, pabbato nāma khattiyō;
Mittāmaccehi sampanno, anantabalavāhano.
10. Sambuddhadassanaṃ gantvā, sutvā dhammamanuttaraṃ;
Nimantetvā sajinasaṅghaṃ, dānaṃ datvā yadicchakaṃ.
11. Paṭṭuṇṇaṃ cīnapaṭṭaṇṇa, koseyyaṃ kambalampi ca;
Sovaṇṇapādukañceva, adāsīṃ satthusāvake.
12. Sopi maṃ buddho byākāsi, saṅghamajjhe nisīdiya;
“Imamhi bhaddake kappe, ayaṃ buddho bhavissati.
13. “Ahu kapilavhayā rammā...pe... hessāma sammukhā imaṃ”.
14. Tassāpi vacanaṃ sutvā, bhiiyo cittaṃ pasādayiṃ;
Uttariṃ vatamadhiṭṭhāsīṃ, dasapāramipūriyā.
15. Sabbaññutaṃ gavesanto, dānaṃ datvā naruttame;
Ohāyāhaṃ mahārajjāṃ, pabbajīṃ jinasantike [\[tassa santike \(sī.\)\]](#).
16. Nagaraṃ sobhavatī nāma, sobho nāmāsi khattiyō;
Vasate tattha nagare, sambuddhassa mahākulaṃ.
17. Brāhmaṇo yaññadatto ca, āsi buddhassa so pitā;
Uttarā nāma janikā, koṇāgamanassa satthuno.
18. Tīṇi vassasahassāni, agāraṃ ajjha so vasi;
Tusitasantusitasantuṭṭhā, tayo pāsādamuttamā.
19. Anūnasolaṣasahassāni, nāriyo samalaṅkatā;
Ruciḡattā nāma nārī, satthavāho nāma atrajo.
20. Nimitte caturo disvā, hatthiyānena nikkhami;
Chamāsaṃ padhānacāraṃ, acarī purisuttamo.
21. Brahmunā yācito santo, koṇāgamanānāyako;
Vatti cakkāṃ mahāvīro, migadāye naruttamo.
22. Bhiyyaso uttaro nāma, ahesuṃ aggasāvakā;
Sotthijo nāmupaṭṭhāko, koṇāgamanassa satthuno.
23. Samuddā uttarā ceva, ahesuṃ aggasāvikā;
Bodhi tassa bhagavato, udumbaroti pavuccati.
24. Uggo ca somadevo ca, ahesuṃ aggupaṭṭhakā;
Sīvalā ceva sāmā ca, ahesuṃ aggupaṭṭhikā.
25. Uccattanena so buddho, tiṃsahatthasamuggato;
Ukkāmukhe yathā kambu, evaṃ raṃsīhi maṇḍito.

26. Tiṃsavassasahassāni, āyu buddhassa tāvade;
Tāvātā tiṭṭhamāno so, tāresi janataṃ bahuṃ.
27. Dhammacetiṃ samussetvā, dhammadussavibhūsitāṃ;
Dhammapupphaguḷaṃ katvā, nibbuto so sasāvako.
28. Mahāvilāso tassa jano, siridhammappakāsano;
Sabbāṃ tamantarahitaṃ, nanu rittā sabbasaṅkhārā.
29. Koṇāgamano sambuddho, pabbatārāmamhi nibbuto;
Dhātuvitthārikaṃ āsi, tesu tesu padesatoti.

Koṇāgamanassa bhagavato vaṃso tevīsatimo.

26. Kassapabuddhavaṃso

1. Koṇāgamanassa aparena, sambuddho dvipaduttamo;
Kassapo nāma gottena, dhammarājā pabhaṅkaro.
2. Sañchaḍḍitaṃ kulamūlaṃ, bahvannaṇānabhojanaṃ;
Datvāna yācake dānaṃ, pūrayitvāna mānaṃ;
Usabhova āḷakaṃ bhetvā, patto sambodhimuttamaṃ.
3. Dhammacakkaṃ pavattente, kassape lokanāyake;
Vīsakoṭisahasānaṃ, paṭhamābhisamayo ahu.
4. Catumāsaṃ yadā buddho, loke carati cārikaṃ;
Dasakoṭisahasānaṃ, dutiyābhisamayo ahu.
5. Yamakaṃ vikubbaṃ katvā, ñāṇadhātuṃ pakittayi;
Pañcakoṭisahasānaṃ, tatiyābhisamayo ahu.
6. Sudhammā devapure ramme, tattha dhammaṃ pakittayi;
Tīṇikoṭisahasānaṃ, devānaṃ bodhayī jino.
7. Naradevassa yakkhassa, apare dhammadesane;
Etesānaṃ abhisamayā, gaṇanāto asaṅkhiyā.
8. Tassāpi devadevassa, eko āsi samāgamo;
Khīṇāsavānaṃ vimalānaṃ, santacittāna tādinaṃ.
9. Vīsabhikkhusahasānaṃ, tadā āsi samāgamo;
Atikkantabhavantānaṃ, hirisīlena tādinaṃ.
10. Ahaṃ tadā māṇavako, jotipāloti vissuto;
Ajjhāyako mantadharo, tiṇṇaṃ vedāna pāragū.
11. Lakkhaṇe itihāse ca, sadhamme pāramaṇiṃ gato;
Bhūmantalikkhakusalo, katavijjo anāvayo.
12. Kassapassa bhagavato, ghaṭikāro nāmupaṭṭhāko;

Sagāravo sappatisso, nibbuto tatiye phale.

13. Ādāya maṃ ghaṭṭikāro, upagañchi kassapaṃ jinaṃ;
Tassa dhammaṃ suñitvāna, pabbajim tassa santike.
14. Āraddhavīriyo hutvā, vattāvattesu kovido;
Na kvaci parihāyāmi, pūresim jinasāsanam.
15. Yāvatā buddhabhaṇitaṃ, navaṅgaṃ jinasāsanam;
Sabbam pariyāpuñitvāna, sobhayim jinasāsanam.
16. Mama acchariyaṃ disvā, sopi buddho viyākari;
“Imamhi bhaddake kappe, ayaṃ buddho bhavissati.
17. “Ahu kapilavhayā rammā, nikkhamitvā tathāgato;
Padhānaṃ padahitvāna, katvā dukkarakārikaṃ.
18. “Ajapālarukkhamūle, nisīditvā tathāgato;
Tattha pāyāsaṃ paggayha, nerañjaramupehiti.
19. “Nerañjarāya tīramhi, pāyāsaṃ paribhuñjiya;
Paṭiyattavaramaggena, bodhimūlamupehiti.
20. “Tato padakkhiṇaṃ katvā, bodhimaṇḍaṃ anuttaro;
Aparājitaṭṭhānamhi [aparājitanisabhaṭṭhāne (ka.)], bodhipallankamuttame;
Pallaṅkena nisīditvā, bujjhissati mahāyaso.
21. “Imassa janikā mātā, māyā nāma bhavissati;
Pitā suddhodano nāma, ayaṃ hessati gotamo.
22. “Anāsavā vītarāgā, santacittā samāhitā;
Kolīto upatisso ca, aggā hessanti sāvakā;

Ānando nāmupaṭṭhāko, upaṭṭhissatimaṃ jinaṃ.
23. “Khemā uppalavaṇṇā ca, aggā hessanti sāvikā;
Anāsavā santacittā, vītarāgā samāhitā;
Bodhi tassa bhagavato, assatthoti pavuccati.
24. “Citto hatthāḷavako ca, aggā hessantupaṭṭhakā;
Nandamātā ca uttarā, aggā hessantupaṭṭhikā”.
25. Idaṃ sutvāna vacanaṃ, assamassa mahesino;
Āmoditā naramarū, buddhabījaṃ kira ayaṃ.
26. Ukkuṭṭhisaddā pavattanti, apphoṭenti hasanti ca;
Katañjalī namassanti, dasasahassī sadevakā.
27. “Yadimassa lokanāthassa, virajjhissāma sāsanaṃ;
Anāgatamhi addhāne, hessāma sammukhā imaṃ.
28. “Yathā manussā nadiṃ tarantā, paṭitthaṃ virajjhiya;

Heṭṭhā titthe gahetvāna, uttaranti mahānadim.

29. “Evameva mayaṃ sabbe, yadi muñcāmimaṃ jinaṃ;
Anāgatamhi addhāne, hessāma sammukhā imaṃ”.
30. Tassāpi vacanaṃ sutvā, bhiyyo cittaṃ pasādayiṃ;
Uttariṃ vatamadhiṭṭhāsiṃ, dasapāramipūriyā.
31. Evamahaṃ saṃsaritvā, parivajjento anācaram;
Dukkarañca kataṃ mayhaṃ, bodhiyāyeva kāraṇā.
32. Nagaraṃ bārāṇasī nāma, kikī nāmāsi khattiyo;
Vasate tattha nagare, sambuddhassa mahākulaṃ.
33. Brāhmaṇo brahmadattova, āsi buddhassa so pitā;
Dhanavatī nāma janikā, kassapassa mahesino.
34. Duve vassasahassāni, agāraṃ ajjha so vasi;
Haṃso yaso sirinando, tayo pāsādamuttamā.
35. Tisoḷasasahassāni, nāriyo samalaṅkatā;
Sunandā nāma sā nārī, vijitaseno nāma atrajo.
36. Nimitte caturo disvā, pāsādenābhinikkhami;
Sattāhaṃ padhānacāraṃ, acarī purisuttamo.
37. Brahmunā yācito santo, kassapo lokanāyako;
Vatti cakkhaṃ mahāvīro, migadāye naruttamo.
38. Tisso ca bhāradvājo ca, ahesuṃ aggasāvakā;
Sabbamitto nāmupaṭṭhāko, kassapassa mahesino.
39. Anuḷā uruveḷā ca, ahesuṃ aggasāvikā;
Bodhi tassa bhagavato, nigrodhoti pavuccati.
40. Sumaṅgalo ghaṭikāro ca, ahesuṃ aggupaṭṭhakā;
Vicitasenā bhaddā [[bhadrā \(ka.\)](#)] ca, ahesuṃ aggupaṭṭhikā.
41. Uccattanena so buddho, vīsātītanuggato;
Vijjulaṭṭhīva ākāse, candova gahapūrito.
42. Vīsativassasahassāni, āyu tassa mahesino;
Tāvātā tiṭṭhamāno so, tāresi janataṃ bahuṃ.
43. Dhammataḷākamaṃ māpayitvā, sīlaṃ datvā vilepanaṃ;
Dhammadussaṃ nivāsetvā, dhammamālaṃ vibhajjiya.
44. Dhammavimalamādāsaṃ, ṭhapayitvā mahājane;
Keci nibbānaṃ patthentā, passantu me alaṅkaraṃ.
45. Sīlakaṅcukaṃ datvāna, jhānakavacavammitaṃ;
Dhammacammaṃ pārupitvā, datvā sannāhamuttamaṃ.

46. Satiphalakaṃ datvāna, tikhiṇaṅṅakuntimaṃ;
Dhammakhaggavaraṃ datvā, sīlasaṃsaggamaddanaṃ.
47. Tevijjābhūsaṇaṃ datvāna, āveḷaṃ caturo phale;
Chalābhiññābharaṇaṃ datvā, dhammapupphapiḷandhanaṃ.
48. Saddhammapaṇḍaracchattaṃ, datvā pāpanivāraṇaṃ;
Māpayitvābhayaṃ pupphaṃ, nibbuto so sasāvako.
49. Eso hi sammāsambuddho, appameyyo durāsado;
Eso hi dhammaratano, svākkhāto ehipassiko.
50. Eso hi saṅgharatano, suppaṭipanno anuttaro;
Sabbhaṃ tamantaraḥitaṃ, nanu rittā sabbasaṅkhārā.
51. Mahākassapo jino satthā, setabyārāmamhi nibbuto;
Tatthevassa jinathūpo, yojanubbedhamuggatoti.

Kassapassa bhagavato vaṃso catuvīsatiṃ.

27. Gotamabuddhavaṃso

1. Ahametarahi sambuddho [buddho (sī.)], gotamo sakyavaḍḍhano;
Padhānaṃ padahitvāna, patto sambodhimuttamaṃ.
2. Brahmunā yācito santo, dhammacakkaṃ pavattayim;
Aṭṭhārasannaṃ koṭīnaṃ, paṭhamābhisamayo ahu.
3. Tato parañca desente, naradevasamāgame;
Gaṇanāya na vattabbo, dutiyābhisamayo ahu.
4. Idhevāhaṃ etarahi, ovadiṃ mama atrajaṃ;
Gaṇanāya na vattabbo, tatiyābhisamayo ahu.
5. Ekosi sannipāto me, sāvakānaṃ mahesinaṃ;
Aḍḍhateḷasasātānaṃ, bhikkhūnāsi samāgamo.
6. Virocamāno vimalo, bhikkhusaṅghassa majjhago;
Dadāmi patthitaṃ sabbhaṃ, maṇīva sabbakāmado.
7. Phalamākaṅkhamānānaṃ, bhavacchandajahesinaṃ;
Catusaccaṃ pakāsemi, anukampāya pāṇinaṃ.
8. Dasavīsasahassānaṃ, dhammābhisamayo ahu;
Ekadvinnaṃ abhisamayo, gaṇanāto asaṅkhiyo.
9. Vitthārikaṃ bāhujaññaṃ, iddhaṃ phītaṃ suphullitaṃ;
Idha mayhaṃ sakyamunino, sāsanaṃ suvisodhitaṃ.
10. Anāsavā vītarāgā, santacittā samāhitā;
Bhikkhūnekasatā sabbe, parivārenti maṃ sadā.

11. Idāni ye etarahi, jahanti mānusaṃ bhavaṃ;
Appattamānasā sekhā, te bhikkhū viññugarahitā.
12. Ariyañca saṃthomayantā, sadā dhammaratā janā;
Bujjhissanti satimanto, saṃsārasaritaṃ gatā.
13. Nagaraṃ kapilavatthu me, rājā suddhodano pitā;
Mayhaṃ janettikā mātā, māyādevīti vuccati.
14. Ekūnatimsavassāni, agāraṃ ajjhahaṃ vasiṃ;
Rammo surammo subhako, tayo pāsādamuttamā.
15. Cattārīsasahassāni, nāriyo samalaṅkatā;
Bhaddakañcaṇā nāma nārī, rāhulo nāma atrajo.
16. Nimitte caturo disvā, assayānena nikkhamiṃ;
Chabbassaṃ padhānacāraṃ, acarīṃ dukkaraṃ ahaṃ.
17. Bārāṇasiyaṃ isipatane, cakkaṃ pavattitaṃ mayā;
Ahaṃ gotamasambuddho, saraṇaṃ sabbapāṇinaṃ.
18. Kolito upatisso ca, dve bhikkhū aggasāvakā;
Ānando nāmupaṭṭhāko, santikāvacaro mama;

Khemā uppalavaṇṇā ca, bhikkhunī aggasāvikā.
19. Citto hatthāḷavako ca, aggupaṭṭhākupāsakā;
Nandamātā ca uttarā, aggupaṭṭhikupāsikā.
20. Ahaṃ assatthamūlamhi, patto sambodhimuttamaṃ;
Byāmapabhā sadā mayhaṃ, soḷasahatthamuggatā.
21. Appaṃ vassasataṃ āyu, idānetarahi vijjati;
Tāvātā tiṭṭhamānohaṃ, tāremi janataṃ bahuṃ.
22. Ṭhapyitvāna dhammukkaṃ, pacchimaṃ janabodhanaṃ;
Ahampi nacirasseva, saddhiṃ sāvakasaṅghato;
Idheva parinibbissaṃ, aggī vāhārasaṅkhayā.
23. Tāni ca atulatejāni, imāni ca dasabalāni [yasabalāni (aṭṭha.)];
Ayañca guṇadhāraṇo deho, dvattiṃsavaraḷakkhaṇavicitto.
24. Dasa disā pabhāsetvā, sataraṃsīva chappabhā;
Sabbhaṃ tamantarāhissanti, nanu rittā sabbasaṅkhārāti.

Gotamassa bhagavato vaṃso pañcavīsatiso.

28. Buddhapakiṇṇakakaṇḍam

1. Aparimeyyito kappe, caturo āsuṃ vināyakā;
Taṇhaṅkaro medhaṅkaro, athopi saraṇaṅkaro;

- Dīpaṅkaro ca sambuddho, ekakappamhi te jinā.
2. Dīpaṅkarassa aparena, koṇḍañño nāma nāyako;
Ekova ekakappamhi, tāresi janataṃ bahuṃ.
 3. Dīpaṅkarassa bhagavato, koṇḍaññassa ca satthuno;
Etesaṃ antarā kappā, gaṇanāto asaṅkhiyā.
 4. Koṇḍaññassa aparena, maṅgalo nāma nāyako;
Tesampi antarā kappā, gaṇanāto asaṅkhiyā.
 5. Maṅgalo ca sumano ca, revato sobhito muni;
Tepi buddhā ekakappe, cakkhumanto pabhaṅkarā.
 6. Sobhitassa aparena, anomadassī mahāyaso;
Tesampi antarā kappā, gaṇanāto asaṅkhiyā.
 7. Anomadassī padumo, nārado cāpi nāyako;
Tepi buddhā ekakappe, tamantakārakā munī.
 8. Nāradassa aparena, padumuttaro nāma nāyako;
Ekakappamhi uppanno, tāresi janataṃ bahuṃ.
 9. Nāradassa bhagavato, padumuttarassa satthuno;
Tesampi antarā kappā, gaṇanāto asaṅkhiyā.
 10. Kappasatasahassamhi, eko āsi mahāmuni;
Padumuttaro lokavidū, āhutīnaṃ paṭiggaho.
 11. Tiṃsakappasahassamhi, duve āsuṃ vināyakā [[āsiṃsu nāyakā \(syā. ka.\)](#)];
Sumedho ca sujāto ca, orato padumuttarā.
 12. Aṭṭhārāse kappasate, tayo āsuṃ vināyakā [[āsiṃsu nāyakā \(syā. ka.\)](#)];
Piyadassī atthadassī, dhammadassī ca nāyakā.
 13. Orato ca sujātassa, sambuddhā dvipaduttamā;
Ekakappamhi te buddhā, loke appaṭipuggalā.
 14. Catunnavutito kappe, eko āsi mahāmuni;
Siddhattho so lokavidū, sallakatto anuttaro.
 15. Dvenavute ito kappe, duve āsuṃ vināyakā;
Tisso phusso ca sambuddhā, asamā appaṭipuggalā.
 16. Ekanavutito kappe, vipassī nāma nāyako;
Sopi buddho kāruṅiko, satte mokesi bandhanā.
 17. Ekatiṃse ito kappe, duve āsuṃ vināyakā;
Sikhī ca vessabhū ceva, asamā appaṭipuggalā.
 18. Imamhi bhaddake kappe, tayo āsuṃ vināyakā;
Kakusandho koṇāgamano, kassapo cāpi nāyako.

19. Ahametarahi sambuddho, metteyyo cāpi hessati;
Etepeime pañca buddhā, dhīrā lokānukampakā.
20. Etesaṃ dhammarājūnaṃ, aññesaṃnekakoṭinaṃ;
Ācikkhitvāna taṃ maggaṃ, nibbutā te sasāvakāti.

Buddhapakiṇṇakakaṇḍaṃ niṭṭhitaṃ.

29. Dhātubhājanīyakathā

1. Mahāgotamo jinavaro, kusināramhi nibbuto;
Dhātuvitthārikaṃ āsi, tesu tesu padesato.
2. Eko ajātasattussa, eko vesāliyā pure;
Eko kapilavatthusmiṃ, eko ca allakappake.
3. Eko ca rāmagāmamhi, eko ca veṭhadīpake;
Eko pāveyyake malle, eko ca kosinārake.
4. Kumbhassa thūpaṃ kāresi, brāhmaṇo doṇasavhayo;
Aṅgārathūpaṃ kāresuṃ, moriyā tuṭṭhamānasā.
5. Aṭṭha sārīrikā thūpā, navamo kumbhacetiyo;
Aṅgārathūpo dasamo, tadāyeva patiṭṭhito.
6. Uṇhīsaṃ catasso dāṭhā, akkhakā dve ca dhātuyo;
Asambhinnā imā satta, sesā bhinnāva dhātuyo.
7. Mahantā muggamattā ca [[muggamāsāva \(ka.\)](#)], majjhimā bhinnataṇḍulā;
Khuddakā sāsapamattā ca, nānāvaṇṇā ca dhātuyo.
8. Mahantā suvaṇṇavaṇṇā ca, muttavaṇṇā ca majjhimā;
Khuddakā makulavaṇṇā ca, soḷasadoṇamattikā.
9. Mahantā pañca nāḷiyo, nāḷiyo pañca majjhimā;
Khuddakā cha nāḷī ceva, etā sabbāpi dhātuyo.
10. Uṇhīsaṃ sīhale dīpe, brahmaloke ca vāmakaṃ;
Sīhale dakkhiṇakkhañca, sabbāpetā patiṭṭhitā.
11. Ekā dāṭhā tidasapure, ekā nāgapure ahu;
Ekā gandhāraṇḍisaye, ekā kaliṅgarājino.
12. Cattālīsasamā dantā, kesā lomā ca sabbaso;
Devā hariṃsu ekekaṃ, cakkavāḷaparamparā.
13. Vajirāyaṃ bhagavato, patto daṇḍaṇca cīvaram;
Nivāsanaṃ kulaghare, paccattharaṇaṃ kapilavhaye [[silavhaye \(syā.\)](#)].
14. Pāṭaliputtapuramhi, karaṇaṃ kāyabandhanaṃ;
Campāyudakasāṭiyaṃ, uṇṇalomañca kosale.

15. Kāsāvaṃ brahmaloke ca, veṭhanaṃ tidase pure;
Nisīdanaṃ avantīsu, raṭṭhe [devaraṭṭhe (syā.)] attharaṇaṃ tadā.
16. Araṇī ca mithilāyaṃ, videhe parisāvanaṃ;
Vāsī sūciḡharañcāpi, indapatthapure tadā.
17. Parikkhārā avasesā, janapade aparantake;
Paribhuttāni muninā, akāmsu manuḡā tadā.
18. Dhātuviṭṭhārikaṃ āsi, gotamassa mahesino;
Pāṇīnaṃ anukampāya, ahu porāṇikaṃ tadāti.

Dhātubhājanīyakathā niṭṭhitā.

Buddhavaṃsoniṭṭhito.